


HEBREUX, KAPU YA SAMBWADI ¹

 . . . nkokila yayi, mpe kuwa Joyce kuyimba. Beno zaba ti ya kele kimangu na yawu mosi? Mwa mwana ya kento yina, wapi mutindu yandi lenda banza na nyonso yina? Mpe nkokila nyonso yandi kele na mosi ya malu-malu samu na beto. Wapi mutindu yandi lenda banza na nyonso yina, ya kele kieleka mwa dibanza ya mayele. Ti Mfumu kusakumuna mwana yango.

² Mbote, mbasi, na ngunga ya zole na ndambu na manima ya midi, na yinzo ya bamvumbi na Charlestown, na Indiana. Ya beto ya luzolo, mpangi ya kento yina me kwenda, Mpangi ya kento Colvin, beto ke pesa yandi buzitu ya nsuka, na—na yinzo ya bamvumbi mpe na ndyamu, mbasi na manima ya midi. Muntu yina mbala mosi zingaka mutindu beno kele na nkokila yayi, mpe me luta na manima ya vwale kisika beno ke luta kilumbu mosi. Mpe muntu nyonso yina ke zola kuvwanda na lukutakanu, mbote, yandi lenda kwiza. Kieleka ya ke vwanda lusalusu ya nene samu na dibuta ya Colvin, na kuzaba ti tabernacle awa, kisika bawu nyonso vwanda kwizaka bamvula mingi, mpe nyonso yina, ke . . . Beto ke sepela na kuzwa beno kukwiza kuna. Mpe mu banza . . . Mpangi ya beto ya bakala ya luzolo McKinney, yandi yina longaka na mafwa ya mpangi ya munu ya bakala, bamvula mingi me luta, ke na kitini ya ngundi na lukutakanu ya mafwa yayi, mpe ba me lomba munu na kwenda mpe kusadisa yandi na—na balukutakanu ya mafwa yango.

³ Mbote, mu me kwiza kaka mwa ntangu ya yimbi, na nkokila yayi. Mu vwanda tula nyonso na ntwala, mu zaba ve wapi nzila ya kubaka. Ya kele na bambokolo mingi, mpe bakupasuka mpe bisumbula, mpe bantu ke bokila, ke kwiza. Tii, mu me bika kaka Louisville, mwa ntangu fyoti me luta, samu na kuvutuka awa na nswalu, mpe kubika bambokolo mingi yina kele kieleka ya nswalu—nswalu mingi mpe yina fwana salama, mu banza, dyaka, na nkokila yayi. Mpe ntangu yayi beno sambila samu na beto na yina beto ke landila.

⁴ Mpe na suka yayi mu—mu vwandaka me kuma ve na dilongi ya munu—ya munu, na kapu ya 7 ya Buku ya—ya—ya Hébreux. Mpe na yina beto ke na kuluta na yawu, na nkokila yayi, mu zola kupesa mazabusu ya balukutakanu ya Mpangi Graham Snelling, kuna na tenta na zulu awa, na nsuka ya Avenue Brigham. Kana Mfumu zola, mu zola kuvutuka Kilumbu ya tatu na nkokila. Mpe kuna beto ke kubika nkokila mosi yina beto ke kwenda kuna mutindu délégation, sabala yayi kilumbu mosi, samu na kukwenda tala Mpangi Graham na lukutakanu. Mpe yandi kele . . . ke tubaka, “Ti bantu kele mingi.” Mpe—mpe yandi ke sepela ti beto kwiza, samu na lusalusu yayi. Mpangi Graham Snelling, beno bayina ke kwendaka na lukutakanu, to

bayina zola, ya kele kaka na nsuka ya Avenue Brigham na zulu awa. Muntu nyonso lenda tuba na beno kisika ya kele. Kaka na nsuka ya balupangu ya bansaka, tenta kele ya kuvwanda kuna. Yandi ke sepela na kusala kintwadi na beto. Samu ti, beto mutindu tabernacle me ndima na kupesa diboko ya beto ya kusala kintwadi na yandi, nkama na zulu ya nkama, na yawu beto ke na kumeka na kusadisa.

⁵ Ntangu yayi, kuna ntama mingi ve beto ke kuma na kisika, kana Mfumu zola, na kapu ya 11 ya Hébreux, na bankokila fyoti, kana Nzambi zola, mpe kuna mu banza ti beto ke kuzwa ntangu mosi mpe ya nene.

⁶ Oh, Mfumu me sakumuna beto na suka yayi na mutindu ya ngitukulu, mutindu Yandi tsyamunaka Mpeve ya Yandi na zulu ya beto! Mpe ntangu yayi, na nkokila yayi, beto ke na kuingila Yandi na kusala yawu dyaka; mpe dyaka na Kilumbu ya tatu na nkokila, mpe kulandila. Mpe—mpe bankokila yina mu ke vwanda ve, Mpangi Neville kele awa samu na kubaka yawu, kana mu kele ve.

⁷ Mu ke zabaka ve yinki mu ke sala, beno lenda vwanda awa ngunga yayi, mpe ngunga yankaka kubokilama na Californie. Beno me mona, beno zaba kaka ve kisika Mfumu ke fidisa beno. Ya kele samu na yina ya kele mpasi samu na munu na kusala banzila mpe kutuba beto ke—beto ke sala *yayi-mpe-yayi*. Mu lenda banda na kusala kima mosi, Mfumu ke fidisa munu kisika yankaka. Beno me mona? Na yawu beto zaba kaka ve yinki Yandi ke sala. Kasi, “Kana Mfumu zola,” beto ke tubaka yawu. Mpe mu banza ba me pesa beto kusalu, to ba me tuma beto ti, na Biblia, “Kana Mfumu zola, beto ke sala bima *yayi-mpe-yayi*.” Na yawu kana beto lenda ve na kusala malaka yina beto. . . . to kuzitisa malaka, beto ke kuwa mutindu ti Mfumu zolaka ve ti ya salama.

⁸ Kilumbu yankaka yina, beto kumaka na ngunga ya yimbi, Mpangi Roberson mpe Mpangi Wood mpe munu mosi. Mpe beto vwanda kumiyufula, “Samu na yinki?” Beto wandaka kuna, wandaka tala na kalati, na kukulumukaka kaka, mpe beto tambulaka dyaka na ditoma bakilometele makumi nana mbala mosi na node. Mpe mu ke zyetaka na autoroute kubanda ntangu mu wandaka na bamvula pene kumi na yiya. Mpe mu ke kumiyufula wapi mutindu mu lendaka sala yawu. Beto wandaka ya kutelama kuna, beno nyonso tatu. Beto nyonso me zyetaka na ba-autoroute. Beto vwanda tala kaka na kalati, beto vwanda landa 130, na kulutaka na Illinois, mpe beto balukaka fyoti, na kutalaka ve ti mwini wandaka na manima ya beto na kisika ya kuvwanda na ntwala ya beto. Beto wandaka kwenda node na kisika ya sude. Mpe kima ya ntete beno zaba, na kuvukana ya banzila, mu me tuba, “Yayi kele ve nzila ya mbote.” Beto me tala kuna, mpe beto me tala ti, beto wandaka makumi

nana ya bakilometele ntama na nzila. Beto me vutuka mbala mosi na manima . . . ? . . .

⁹ Na yina ntangu beto vwandaka vutuka, beto—beto vwandaka zonzila. Mu tubaka, “Beno zaba samu na yinki? Beto . . . Ya lendaka vwanda ti Mfumu me zola kulutisa beto nzila yayi, samu na kubumba beto na kisumbula ya mawa kisika mosi awa, yina zolaka sala kima mosi na mutindu yankaka. Beto zaba ti bima nyonso ke tambula kintwadi samu na bumbote ya bayina ke zolaka Mfumu. Ya kele nyonso yina beto lenda bumba na yintu.”

¹⁰ Ntangu yayi, na nkokila yayi, beto ke banda awa mwa lesu ya malongi. Mpe kana mu . . . Mu banza ve kana beto ke kuma, ya lendaka vwanda ti beto ke lenda na nkokila yayi, na . . . Yayi kele kapu ya nene ya malongi na mosi ya kumi, samu na dibuundu. Mpe ya kele dilongi ya nene, na yina beto lendaka vwandila na yawu basabala mpe basabala, na kima mosi yina, mutindu Abraham futaka bikunku ya kumi na Melchisédek, mpe kana ya kele mfunu to ve.

¹¹ Ventilateur yayi ke na kutalisa muntu mosi mpasi na manima kuna? Beno ke zola ba kufwa yawu to ve? Kana ya ke na kutalisa muntu mpasi, na kufulaka mupepe na kizizi ya bawu, mosi ya ba-ventilateur. Kana ya kele, beno telemisa kaka maboko ya beno. Mpe, to beno fidisa mosi ya ba-huissier, beno fidisa muntu na mpangi ya bakala awa, yandi ke kufwa yawu na nswalu samu na beno. Mpe mu ke salaka mutindu kufwa yawu samu na munu; mu ke na kuwa mupepe ya tiya mpe mu ke na mutoki, na yina, kima ya ntete beno zaba, mu—mu kele na ndinga me kangama. Na yawu, ya kele na zulu ya beno, kuna ya ke sala munu ata mpasi mosi ve. Beto zola beno kuvwanda mbote ntangu yayi.

Beto ke meka na kubaka mwa ntangu mingi ya beno, kasi kaka na kutalaka mbala mosi na kati ya Ndinga. Mpe ntete beto sala yawu, beto zonza na Musoniki kaka mwa ntangu fyoti.

¹² Ntangu yayi, Tata ya Mazulu, beto zaba ve yinki kele na kati ya kibumbulu. Kasi kima kaka yina beto zaba, mpe beto me ndima, ti bima ya mbote kele na ntwala ya beto. Samu ti ya kele ya kusunama, “Yina disu me monaka ve, to yina dikutu me kuwaka ve, to dyaka yina me kotaka na bantima ya bantu, yina Nzambi kele na yawu samu na bawu na kibumbulu, bayina zola Yandi.”

¹³ Mpe beto ke sambila ti Nge ke fungula banela ya Mazulu na nkokila yayi, na kibumbulu ya Nge, mpe kupesa beto Ndinga ya Nge, yina ke vwanda kima yina kele ya kulunga, kima yina ke kulisa lukwikilu ya beto mutindu Miklisto, mpe kukumisa beto mingi—mingi ya kukangama na Nsangu ya mbote, kulutila na yina beto vwandaka ntangu beto kotaka. Pesa yawu, Tata. Ti Mpeve-Santu kubaka Ndinga ya Nzambi mpe kunata Yawu na

konso ntima landila nsatu ya beto. Na Nkumbu ya Yesu, Mwana ya Nge ya luzolo, beto me sambila. Amen.

¹⁴ Ntangu yayi, na suka yayi, na kumanisaka nzila ya nsuka ya kapu ya 6, na yawu beto lenda kwenda mbala mosi na ya 7.

Kisika muntu yina tekilaka samu na beto kotaka, Yesu, kumaka nganga-Nzambi ya ntete tii seko na mutindu ya Melchisédek.

¹⁵ Ntangu yayi beto ke tanga banzila tatu ya ntete, to banzila zole ya ntete, to banzila tatu ya ntete, na kisika, ya kapu ya 7, na yawu beto lenda banda mbala mosi.

Samu ti Melchisédek yayi, ntinu ya Salem, nganga-Nzambi ya Nzambi ya zulu mingi, yina kutanaka Abraham na kuvutukaka na bitumba yina yandi nungaka bantinu, mpe sakumunaka yandi;

Na yandi mpe Abraham pesaka mosi ya kumi ya nyonso, (beno tala bikunku kumi ya beno); na kuvwandaka na ntete landila lutendulu Ntinu ya ludedomo, . . . na manima ya yina mpe Ntinu ya Salem, yina kele, Ntinu ya ngemba;

Yina ke na tata ve, mama ve, dikanda ve . . . yina ke na mbandukulu ve . . . yina kele na mbandukulu ya bilumbu ve, to nsuka ya luzingu ve; kasi ya kusala mutindu na Mwana ya Nzambi; ke landila na kuvwanda nganga-Nzambi ntangu nyonso.

¹⁶ Wapi mutindu ya nsamunu ya mbote yayi! Ntangu yayi beto fwana vutuka na manima na Ngwisani ya Ntama, samu na kutimuna bima yayi ya nene ya ngudi. Mpe, oh, mutindu mu zola yawu!

¹⁷ Beno zaba, kuna na Arizona, beto vwanda talaka bisika. Mpe beto ke kwenda na kitini mosi ya ntoto yina ke talana ya kulunga, tata Mc Anally mpe munu mosi. Mpe beto ke mona kisika mosi kisika ya ke talana mutindu, na mwa mabulu, kisika mwa tiyo yina ke lutisa maza, yina ba ke bokilaka “mabulu ya fyoti.” Mpe mu ke . . . Yandi ke sala munu kunyeka mpe ke sala munu kunika zyelo mpe “fiu,” kufula yawu. Kunika dyaka mpe “fiu,” kufula yawu. Mpe mu vwanda kumiyufulaka samu na yinki yandi vwandaka sala yawu. Mu bakulaka ti, beno me mona, ntangu beno ke fulaka zyelo, ya ke pete-pete. Mpe na nyonso, disasi mpe, kele mingi pete-pete na wolo. Wolo kele kilo mingi kulutila plomb. Na yawu ntangu beno ke fulaka, nyonso yankaka ya bima mpe zyelo mpe ntoto ke kwenda na mupepe, kasi wolo ke vwanda kaka na zulu ya ntoto. Na yawu, kana beno kuzwa mwa bamaza yina ba me sukula malonga yina me katuka na zulu *awa*, ya ke lakisa dibulu ya wolo kisika mosi kuna na zulu. Mvula yayi me sukula mwa bitini yayi. Na yawu kuna beto ke kuzwa ba-piki mpe nyonso yankaka, mpe ke timuna pene, mwa-ngumba yango, na kumekaka na kuzwa wolo yayi. Beto ke tobola mabulu na

ntoto, ke timuna yawu. Ke tula dynamite, ke pasula yawu. Beto ke landila na kutobola mabulu, na kukwendaka na yisi tii beto ke tala, kutala dibulu ya ngudi. Mbote, ya kele yina beto ke bokilaka “kutala bisika.”

¹⁸ Mpe na nkokila yayi beto ke meka na kubaka Ndinga ya Nzambi, mpe kusadila Yawu na nzila ya ngolo ya Mpeve-Santu, samu na kufula bakukondwa kukipe nyonso mpe bantembe ntama na beto, mwa bima nyonso yango ya pete-pete ya kukondwa luvalu yina kele kaka ve na lufulu, yina kele na ata kilo ve na luzingu ya beto, beto zola kufula yawu nyonso ntama samu beto kuzwa Dibulu yayi ya nkembo. Dibulu yango kele Klisto.

¹⁹ Mpe ntangu yayi ti Nzambi sadisa beto na yina beto ke tanga mpe ke longoka na Ndinga ya Yandi. Makapu tatu ya ntete, ya nsuka, na kutala, beto vwandaka zonzila na kuwa, kaka ntangu yayi mpe kuna, na Melchisédek.

²⁰ Ntangu yayi, mu banza ti Paul pesaka lutendulu ya kulunga.

Samu ti Melchisédek yayi, ntinu ya Salem, . . .

“Ntinu ya Salem.” Mpe kizabi nyonso ya Bibia zaba ti Salem vwandaka na ntama . . . Ba vwanda bokilaka Jérusalem na ntama “Salem.” Mpe Yandi vwandaka Ntinu ya Jérusalem. Beno tala Yandi mbote.

. . . nganga-Nzambi ya Nzambi ya zulu mingi, (yina kele musambidi), yina kutanaka Abraham . . .

Mu zola kubaka lubutuku ya Yandi, Muntu ya nene yayi, samu ti beno kuzaba Nani Yandi kele, ntete, mpe na manima beno . . . beto ke landila na disolo.

. . . na kuvutukaka na bitumba yina yandi nungaka bantinu, mpe sakumunaka yandi;

Na yandi . . . Abraham pesaka mosi ya kumi . . . ntete . . . landila lutendulu Ntinu ya ludedomo, . . .

Ntangu yayi beno tala mbote, “Ludedomo.” Ntangu yayi, beto kele na ludedomo ya yandi mosi muntu, beto kele na ludedomo yina ba me bongisa, beto kele na ludedomo yina ba me balula, mitindu nyonso. Kasi ya kele na ludedomo mosi ya kieleka, mpe ludedomo yango ke katuka na Nzambi. Mpe Muntu yayi vwandaka Ntinu ya ludedomo. Nani Yandi lenda vwanda?

²¹ Ntangu yayi, Yandi vwandaka Ntinu ya ludedomo, Ntinu ya Jérusalem, Ntinu ya ludedomo Ntinu ya ngemba. Ba vwanda bokila Yesu, “Mwana ya bakala ya ntinu ya ngemba.” Mpe mwana ya bakala ya ntinu kele mwana ya ntinu. Na yawu, Muntu yayi vwandaka Ntinu ya ngemba, na yina Yandi zolaka vwanda Tata ya Mwana ya ntinu ya ngemba. Beno me bakula yawu?

²² Ntangu yayi beto mona, beto baka lubutuku ya Yandi mwa fyoti ntama, samu na kumona kisika beto ke na kukwenda.

Yina ke na tata ve, . . .

Ntangu yayi, Yesu kuzwaka Tata. Beno ke kwikila yawu? Kieleka Yandi vwandaka.

. . . mama ve, . . .

Yesu kuzwaka mama. Kasi Muntu yayi kuzwaka ata tata to mama ve.

. . . dikanda ve, . . .

Yandi kuzwaka ata mbala mosi ve muntu na yina Yandi basikaka, ata dikanda. Yandi vwandaka ntangu nyonso. “Dikanda ve.”

. . . yina ke na mbandukulu ya bilumbu ve, . . .

Yandi kuzwaka ata mbala mosi ve ntangu mosi ti Yandi bandaka.

. . . to nsuka ya luzingu ve; . . .

Yawu zolaka vwanda kima yankaka ve kasi Nzambi. Ya kele nyonso Yawu zolaka vwanda.

²³ Mbote, ntangu yayi kana beno tala na yina beto ke tanga nzila yina ke landa. Beno me mona? “Na ntete, na kuvwandaka na nzila ya lutendulu, Ntinu ya ludedomo.” Ya kele ve kisika mu vwanda zola. Nzila ya 3:

. . . to nsuka ya luzingu ve; kasi ya kusala mutindu na Mwana ya Nzambi; . . .

Ntangu yayi, Yandi vwandaka ve Mwana ya Nzambi, samu ti, kana Yandi vwandaka Mwana, Yandi zolaka kuzwa mbandukulu. Mpe Muntu yayi kuzwaka ata mbandukulu ve. Kana Yandi vwandaka Mwana, Yandi zolaka kuzwa nyonso zole tata mpe mama. “Mpe Muntu yayi kuzwaka ata tata to mama ve. Kasi ba salaka Yandi *mutindu na Mwana ya Nzambi*.”

. . . ke landila na kuvwanda nganga-Nzambi ntangu nyonso.

²⁴ Ntangu yayi, Docteur Scofield mekaka na kutuba, ti, “Ya vwandaka kinganga-Nzambi, na nkumbu, ‘Kinganga-Nzambi ya Melchisédek.’”

Kasi mu zola kaka kunata beno na yawu kaka na baminuti fyoti. Kana ya vwandaka kinganga-Nzambi, na yina ya zolaka kuzwa mbandukulu, mpe ya zolaka kuzwa nsuka. Kasi, “Yayi kuzwaka ata mbandukulu to kuzwaka ata nsuka ve.” Mpe yandi tubaka ve ti yandi kutanaka na kinganga-Nzambi. Yandi kutanaka Muntu, mpe bokilaka Nkumbu ya Yandi “Melchisédek.” Yandi vwandaka Muntu, dénomination ve, kinganga-Nzambi ve to butata ve. Yandi vwandaka kieleka Muntu na Nkumbu ya Melchisédek, yina vwandaka Ntinu ya Jérusalem. Kinganga-Nzambi ve, kasi Ntinu ya kukondwa tata. Bunganga-Nzambi ke na tata ve. “Mpe Muntu yayi vwandaka ya kukondwa tata, ya kukondwa mama, ya kukondwa mbandukulu

ya bilumbu to nsuka ya luzingu.” Ntangu yayi, Mwana ya Nzambi. . .

²⁵ Nani yayi vwandaka, yayi vwandaka Jéhovah. Yayi vwandaka Yandi mosi Nzambi ya ngolo nyonso. Ya zolaka vwanda yankaka ve.

²⁶ Ntangu yayi beno tala, “Yandi ke landila na kuvwanda kukondwa nsuka.” Yandi kele na kimbangi awa, ti, “Yandi kele moyo. Yandi me kufwaka ata mbala mosi ve.” Ata mbala mosi ve ti Yandi salaka. . . Yandi vwandaka ata mbala mosi ve kima yankaka kasi ya moyo. “Yandi ke landila na kuvwanda kukondwa nsuka.”

²⁷ Ntangu yayi, Yesu vwandaka ya kusala, mutindu na Yandi. Ntangu yayi, ya kele samu na yina ti ya kele na luswaswanu na kati-kati na Nambi mpe Yesu: Yesu kuzwaka mbandukulu; Nzambi kuzwaka ata mbandukulu ve. Melchisédek kuzwaka ata mbandukulu ve, mpe Yesu kuzwaka mbandukulu. Kasi ba salaka Yesu, mutindu na Yandi. “Nganga-Nzambi, ke landila na kuvwanda kukondwa nsuka.”

²⁸ Ntangu yayi, ntangu Melchisédek vwandaka na zulu ya ntoto, Yandi vwandaka kima ve na yinza kasi Jéhovah Nzambi yina me talana na nzila ya ngidikulu, Yandi vwandaka awa mutindu théophanie. Abraham kutanaka na Yandi mbala mosi, na tenta ya yandi. Mpe mutindu beto tubaka na suka yayi, “Abraham bakulaka Yandi. Mpe Yandi tubaka na Abraham yinki Yandi zolaka kwenda sala, samu ti Yandi zolaka bika ve kibyadi ya yinza mpofo na bima yina Yandi zolaka kwenda sala.”

²⁹ Ti mu telama awa minuti mosi, samu na kutuba, Nzambi kele dyaka na dibanza mosi samu na Dibuundu ya Yandi. Beno kele ve bana ya mpimpa. Beno kele bana ya Nsemo. Mpe. . . beto bayina. . . “Kyese na bayina kele ya lembami, samu ti bawu ke byadila ntoto.” Mpe Nzambi yina ke zola, Yandi yina salaka na—na Abraham, yandi yina zolaka byadila ntoto. . . Mpe Yandi tubaka, “Mu ke bumba ve bima yayi na muntu yina ke byadila ntoto.” Wapi mutindu ya kulutila Yandi ke monikisa mansweki ya Yandi na Dibuundu ya Yandi yina ke byadila ntoto!

³⁰ Daniel ke tuba, “Na kilumbu yina bawu ke kima awa mpe kuna, luzabu ke bwelama.” Mpe yandi tubaka, “Muntu ya ndwenga ke zaba Nzambi ya bawu, na kilumbu yina, mpe ke sala mambu ya nene na kilumbu yina. Kasi bantu ya yimbi ke zaba ve Nzambi ya Mazulu.” Bawu zaba Yandi na mutindu mpe na misiku, mutindu leso ya beto ya ntete vwanda tuba, kasi bawu zaba Yandi ve na mutindu ya kulunga.

³¹ Mpe Nzambi lenda sala kaka na nzila ya kulunga, samu ti Yandi kele ya Kulunga. Lusakumunu na Nkumbu ya Yandi! Ya fwana vwanda kanale ya kulunga yina Nzambi ke lutila na kusala, samu ti Yandi lenda ve kusala kima yankaka kasi kusala na nzila ya kulunga. Yandi na mutindu nyonso lenda ve Yandi

mosi kubeba. Mpe na yina ya kele samu na yina Yesu kwizaka samu na kukatula masumu ya beto, samu ti beto vwanda ya kulunga, ti Nzambi zolaka sala na nzila ya Dibuundu ya Yandi. Ya kele kisika dinsweki kele.

Ya kele kisika yinza kele mpofu. Ya kele kisika bawu zola kutuba, ti, “Beno me zimbisa dibanza ya beno.” Ya kele kisika bawu zola kutuba, “Beno zaba ve yinki beno ke na kutuba.”

Samu ti, “Bima ya Mfumu kele bulawu samu na mayela ya yinza yayi. Kasi bima ya yinza kele nsuni samu na mukwikidi.” Na yawu, beno kele muntu ya mutindu yankaka, beno ke na kuzinga na kitezo ya mutindu yankaka. Beno kele dyaka ve ya yinza yayi. Beno me luta luzingu yayi na Luzingu ya malu-malu.

³² Na yawu, Nzambi ke monikisaka, ve na yinza, ve na psychologiste, ve na mulongi yina me longoka, kasi na ntima ya kulemvuka. Bantu ya Yandi yina kele ya lembami, Yandi ke monikisa mansweki ya bima ya nene ya Nzambi, na bawu. Beno me mona yawu?

³³ Mbote, ntangu yayi, Abraham zolaka byadila yinza. Na nzila . . . Na Nkuna ya Abraham yinza nyonso zolaka sakumuna. Na yawu Nzambi kulumukaka mpe zonzaka na yandi, na nzutu ya Muntu.

Ntangu yayi, Nzambi ke vwandaka ntangu nyonso na zulu ya ntoto. Nzambi me bika ata mbala mosi ve ntoto. Kana Yandi meka na kubika ntoto, mu zaba ve yinki ya ke kuma. Kasi Nzambi ke vwandaka ntangu nyonso awa na mutindu mosi. Oh, nkembo na Nkumbu ya Yandi!

³⁴ Yandi vwandaka na bana na ntoto ya kuyuma, na kubasikaka na Égypte, na mutindu ya Nsemo. Yandi zonzaka na Abraham na mutindu ya Muntu. Yandi zonzaka na Moïse na mutindu ya Muntu. Yandi zonzaka na Dibuundu na mutindu ya Muntu, Mwana ya Yandi, Klisto Yesu.

Mpe Yandi ke na kuzonzila na Dibuundu ya Yandi bubu yayi, na Dibuundu ya kupakulama ya Nzambi ya moyo, na nzila ya banzungu ya ntoto. “Beno kele bintala. Mu kele Vinu.” Nzambi ke zonzaka dyaka, mpe yinza ke monaka Yesu mutindu beno ke lakisa Yandi. Ya kele mutindu yinza ke mona . . . “Beno kele mikanda ya kusonama, yina bantu nyonso ke tangaka.” Luzingu ya beno ke tuba yina beno kele.

³⁵ Ntangu yayi, Abraham yayi na nzila ya yandi, na kuvutukaka. Beto ke kuvutuka mpe ke tanga na yina me tala yandi kaka mwa ntangu fyoti, na Buku ya Genèse. Na kapu ya 14 ya Genèse, mu banza ti ya kele yawu. Oh, mutindu kitoko disolo kele awa! Mbote, beto nyonso zaba na Abraham, mutindu ti Nzambi kubokilaka yandi na kubasika na yinsi ya Chaldée mpe na mbanza ya Ur, mpe tubaka na yandi na kukabuka yandi mosi na bampangi ya yandi.

Ntangu Nzambi ke bokilaka babakala to bakento, Yandi ke bokilaka na kukabuka.

³⁶ Ntangu yayi, ya kele yina kele dyambu na mabuundu bubu yayi, bawu zola ve kukabuka bawu mosi na mikwi- . . . bantu ya kukondwa lukwikilu ya ntama ya nsuni. Ya kele samu na yina beto lenda kwenda ata fyoti ve na ntwala. Beto ke kota kaka na nzila yango mosi ya nsuni, mpe beto—beto ke tuba, “Oh, Jim kele muntu ya mbote, kana yandi ke kunwaka. Kana yandi . . . Mpe mu ke kwendaka na yandi na billard, kasi mu ke bulaka ve billard. Mu—mu—mu ke kwendaka na yandi na feti. Bawu ke tubaka bansaka ya mvindu, mpe nyonso yina, kasi mu ke tubaka ata mosi ve.”

³⁷ “Beno basika na kati-kati ya bawu.” Ya kele kieleka. “Beno kabuka. Beno simba ve bima ya bawu ya yimbi, mpe Mu ke yamba beno,” me tuba Mfumu. “Beno kangama ve na kizitu na bantu ya kukondwa lukwikilu, kukangama kintwadi na kizitu ya mutindu yankaka.” Beno sala yawu ve. Beno kukabuka beno mosi.

³⁸ Mpe Nzambi bokilaka Abraham na kukabuka yandi mosi na dikanda ya yandi nyonso, mpe na kutambula na Yandi. Mpangi, bantangu yankaka ya zola kutuba kukatuka dibuundu. Ya zolaka kutuba yina samu na Paul. Yandi zolaka bika dibuundu ya yandi. Ya zolaka kutuba na bantu mingi. Bantangu yankaka ya zola kutuba kubika yinzo. Bantangu yankaka ya zola kutuba kubika tata mpe mama, mpe kulosa nyonso. Mu zola kutuba ve ti ya ke salamaka ntangu nyonso, kasi bantangu yankaka ya ke salamaka. Ya zola kutuba ti beno fwana katula nyonso yina kele na kati-kati ya beno mpe Nzambi, mpe kutambula na Yandi kaka. Oh, kominyo ya mbote, ya kusakumuna yango, kubundana yango yina beno ke kuzwa ntangu beno ke kukabuka beno mosi na bima ya yinza mpe mikwikidi ya nsuni bayina ke na kuseka beno, mpe ke tambula kaka na Klisto!

³⁹ Bambala yikwa ti mu me tondaka Nzambi! Yandi tubaka, “Mu ke pesa beno batata mpe bamama na yinza ya bubu yayi. Mu ke pesa beno bankundi mpe bampangi. Mpe Mu ke bika beno ata mbala mosi ve, to dyaka ti Mu ke bika beno. Kana ti yinza ya muvimba pesa beno mukongo ya yawu, Mu ke kwenda na beno, tii nsuka ya nzila.”

⁴⁰ Wapi bweso ya kusakumuka, ti ba me lomba muntu na kulanda Mfumu Yesu, na kukabuka yandi mosi na bampangi ya yandi nyonso ya nsuni, samu na kulanda Mfumu! Mpe kana bantu ke monana mutindu ti ke zola ve kudyata bawu mosi na mutindu ya kulunga, mpe kukitalana mutindu Miklisto, kasi zola bima ya nsuni, ya kele mbote samu na beno na kusosa na nswalu mpangi yankaka. Ya kele kieleka. Mpe kana muntu ve ke tambula na nge, ya kele na Mosi yina silaka na kutambula na nge. Ya kele, Mfumu Yesu ya kusakumuna, Yandi ke tambula na nge.

41 Nzambi tubaka na Abraham na, “Kabuka.” Mpe kaka mutindu muntu vwandaka Abraham, yandi bakaka papa ya yandi na yandi, yandi bakaka mwana ya bakala ya mpangi ya yandi ya bakala, mwana-nkazi ya yandi; bawu nyonso ya kukangama na yandi. Mpe Nzambi ata mbala mosi ve sakumunaka yandi tii ntangu yandi salaka yina Nzambi tubaka na yandi na kusala.

42 Mu ke tuba ve ti beno kele ve Muklisto. Na yina, mu ke katula muntu ve na Buklisto. Kasi mu ke tuba yayi, ti kana Nzambi tubaka na beno kima ya kusala, ata mbala mosi ve Yandi ke sakumuna beno tii ntangu beno ke sala yawu. Mu kele na chaire na nkokila yayi na mosi ya bima yango ya kukangama na munu. Balukutakanu ya munu kele ve yina ya zolaka vwanda, bamvula zole me luta. Ya kele samu mu kondwaka na Mfumu. Yandi tubaka na munu na, “Kukwenda na Afrika, mpe na manima na Inde.” Yawu yayi awa, ya kusonama kaka awa, na manima ya Buku yayi, kaka awa.

43 Mubongisi bokilaka munu, yandi tubaka, “Bika ba-Afrikaner yango. Inde me kubama.”

44 Mpeve-Santu me kutana na munu, me tuba, “Nge ke kwenda na Afrika mutindu Mu me tuba na nge.”

45 Mpe mvula yankaka lutaka. Mpe mibongisi...Mu zimbanaka Yawu. Yandi tubaka, “Beto ke na kwenda na Inde. Babiye kele dezia awa.”

46 Mu kwendaka, mu zimbanaka Yawu tii ntangu mu kumaka na Lisbon. Kuna, mpimpa mosi, mu banzaka ti mu vwanda kufwa. Suka yina landaka mu bandaka, na kukwenda na kikozo, samu na kuyobila. Oh, mu vwandaka ya kubela, na mpasi mu vwanda lenda kutelama. Kuna, Nsemo yango vwandaka ya kunamika kuna na kikozo, tubaka, “Mu banza ti Mu tubaka na nge na, ‘Kukwenda ntete, na Afrika.’”

47 Balukutakanu ya munu ke na kubwaka malembe-malembe katuka ntangu yina. Ata ti mu kwendaka na Inde, na pene ya ndambu ya mafuku ya bantu ya kutelama kuna, kasi yina vwandaka sala ve yina Nzambi tubaka na kusala. Mu ke tala ti balukutakanu ya munu ke kwenda dyaka ve na ntwala tii ntangu mu ke vutuka kaka mpe ke sungika kima yango. Ata yina mu ke sala, ya kele ntete, Afrika, samu ti beno fwana sala yawu. Ya kele na Ndinga ya Seko ya Nzambi, ya kuvwanda kuna. Mu zabaka mbote mingi kulutila yawu. Kasi mu fwana vutuka. Mpe mu ke tala ti mvula yayi yina ke na kwiza kele ntangu mu ke basika na mpusu ya munu, na nzila ya lusalusu ya Mfumu.

48 Nsangu ya mbote ya ntama, ya nkembo yayi yina vwanda kula malembe, mutindu yinti ya chène, kasi mu ke kwikila ti yandi me yilama na kubasisa bintala ya yandi ntangu yayi. Mu ke kwikila yawu, ti Nsangu ya nene yayi mpe kima ya nene yayi, mu

ke kwikila ti Mfumu ke bika dyaka beto kuningisa yinza samu na nkembo ya Nzambi.

⁴⁹ Beno fwana sala yina Nzambi me tuba na beno na kusala. Mpe Abraham kwendaka kaka, na kubakaka bantu ya yandi na yandi. Yandi vwandaka zola bawu. Yina kele kitini ya kimuntu. Kasi na manima ya mwa ntangu, kilumbu na manima ya kilumbu, tata ya yandi kufwaka mpe yandi zikaka yandi. Na manima yandi vwandaka na mwana-nkazi ya yandi, kuna mindondo mpe kuswana kubandaka. Mpe, na nsuka, Lot salaka nsodolo ya yandi mpe kulumukaka na Sodome. Mpe beno tala Abraham, yandi swanaka ve na Lot. Yandi tubaka, “Beto kele bampangi. Beto fwana swana ve. Kasi nge telemisa yintu ya nge mpe nge kwenda kisika nyonso nge zola kukwenda. Kana nge kwenda na esete, mu ke kwenda na wesete. Nge kwenda na node, mu ke kwenda na sude.” Ya kele nkadulu ya Muklisto, ke zola kupesa muntu yankaka kitini ya mbote ya kima. Ntangu nyonso kupesa yawu na yandi, kubika yandi kusala nsodolo ya yandi.

⁵⁰ Samu na yinki? Yinki salaka Abraham kusala yawu? Yandi zabaka ti Nzambi silaka yandi ti yandi ke byadila kima nyonso ya movimba, na mutindu nyonso. Amen. Na yawu, kuna, tenta to yinzo, samu na yinki beto ke kipe? Kima nyonso ya movimba kele ya beto. “Kyese na bayina kele ya lembami samu ti bawu ke byadila ntoto.” Ya kele nyonso ya beto. Nzambi tubaka yawu. Na yawu pesa muntu nsodolo ya mbote, kana yandi zola. Ya lendaka vwanda nyonso yina yandi ke kuzwa. Kasi yawu nyonso kele ya beno, bibiyadi ya mpulusu na nzila ya nsilulu. Ya kele nyonso ya beno.

⁵¹ Na yawu, Sara, kento ya kulutila kitoko na yinsi, yandi vwandaka ya kuvwanda kuna na zulu ya mwa-mongo na bakala ya yandi mutindu yandi zolaka sala. Yandi vwandaka ya kulwata bilele ya mpamba, mbote, ya lenda vwanda vwanda lwata barobe ya mpamba ya calico, to nyonso yina beno zola kubokila yawu. Na yina, Mama Lot vwanda lwata mutindu muntu ya mbongo mingi. Mpe bakala ya yandi vwandaka mfumu ya mbanza. Yandi vwandaka zuzi yina vwanda vwanda na ntwala ya nkotolo. Yandi vwandaka na nyonso; yandi vwandaka vwanda na baselekele nyonso ya kutunga-bilele mpe kubula bakalati yina vwanda salama na Sodome mpe Gomorrhe. Kasi Sara vwanda zola mingi kuzinga na bakala ya yandi na madya fyoti, mpe kuzaba ti yandi vwandaka na kati ya luzolo ya Nzambi, ti kusepela na bimvwama, to biese ya bimvwama samu na ntangu mosi. Ya kele kieleka. Ya kele ntangu Nzambi ke kwiza tala.

⁵² Mpe kilumbu mosi, beno, kaka kieleka mutindu beno ke baka nzila ya yimbi, ya ke simba beno kilumbu mosi. Beno lendaka banza ti nyonso ke vwanda mbote samu na beno. Beno lendaka banza ti beno ke luta, kasi beno kele ve. Ya lenda monana mutindu ti ya kele nyonso ya kufuka, kasi ya kele ve ya kufuka. Nzambi zaba nyonso. Yandi zaba kana beno zola kieleka

kutuba lufungulu ya beno to ve. Yandi zaba kana beno zola kieleka kutuba ti beno ke kwikila Yandi mpe kele ya kuvuuka, mpe me ndima Yandi, mpe beno kele ya kufwa na bima ya yinza, mpe beno kele moyo na Klisto. Yandi zaba yawu.

⁵³ Ntangu yayi, beto tala Abraham, mu zola beno kutala mpeve ya kieleka yayi. Oh, kima nyonso ya muvimba ya kusakumuka awa kele lemvo. Mu zola beno kutanga na munu ntangu yayi na kapu ya 14 ya Exode, kaka mwa ntangu fyoti.

⁵⁴ Ntangu yayi, kima ya ntete kusalamaka ntangu bawu kumaka kuna, Lot kuzwaka bankwamusu. Samu na yinki? Yandi vwandaka na ngaanda ya luzolo ya Nzambi. Mpe kana beno kuzwa bankwamusu na yina beno kele na kati ya luzolo ya Nzambi, Nzambi ke sadisa beno na kubasika. Kasi kana beno kele na bankwamusu, na ngaanda ya luzolo ya Nzambi, ya kele kaka na kima mosi ya kusala, beno vutuka dyaka na kati ya luzolo ya Nzambi.

⁵⁵ Ntangu yayi, bantinu nyonso kuvukanaka kintwadi, mpe bawu talaka ti banseke kuna vwandaka ya kutula maza mbote mpe bawu zolaka kulumuka kaka mpe kubaka mwa bambanza ya ntama yayi Sodome, Gomorrhe, kuyala yawu. Mpe bawu salaka. Mpe na yina bawu kulumukaka mpe yalaka yawu, bawu bakaka Lot na bawu.

⁵⁶ Mu zola beno kutala Mpeve ya klisto awa na kati ya Abraham. Ntangu yayi beno tala nzila ya 14.

Mpe na yina Abraham kuwaka ti mpangi ya yandi ya bakala . . . (Beni ke bakula yawu?) . . . ba kangaka mpangi ya yandi ya bakala, yandi pesaka binwanunu na bisadi ya yandi yina longokaka, bayina butamaka na yinzo ya yandi mosi, bankama tatu mpe kumi na nana, mpe landaka bawu tii na Dan.

⁵⁷ Oh, wapi mutindu ya dibanza ya kusakumuna ya lemvo! Abraham, na yina mpangi ya yandi ya bakala, ata ti kondwaka lemvo, ata ti vwandaka na mutindu ya kuvutuka manima yayi; na yina yandi kuwaka ti yinza me simba yandi, mpe me kanga yandi mpe me nata yandi, samu na kwenda kufwa yandi, Abraham salaka na Mpeve ya Klisto. Yandi me kwiza mpe me pesa binwanunu na bantu ya yandi nyonso bayina butamaka na yinzo ya yandi, mpe kwendaka na manima ya bawu, mpe landaka bawu nzila nyonso tii na Dan. Mpe Dan kele bitini ya yisi ya Palestine, “Dan tii Beer-Schéba,” na nsuka mosi tii na yankaka. Mpe ya kele kifwanusu ya Klisto, ntangu Yandi monaka ti yinza vwandaka me baka . . . vwanda me kubwa, na yina Yandi landaka mbeni tii na nsuka, samu na kuyamba nkuna ya Adam yina kubwaka.

⁵⁸ Mu zola beno kutala nzila yina ke landa, mutindu mbote awa Mpeve ke zonga na nzila ya yandi. Mbote mingi, nzila ya 15 ntangu yayi.

Mpe yandi vutulaka bimvwama nyonso (nyonso), mpe vutulaka dyaka mpe mpangi ya yandi ya bakala Lot, mpe bimvwama ya yandi, mpe bakento mpe, mpe bantu.

59 Na yina Abraham kwendaka na manima ya mbeni yina bakaka mpangi ya yandi ya bakala, yandi landaka yandi nzila nyonso na yinsi, tii na Dan, mpe vutulaka nyonso yina yandi zimbisaka na kubwa.

60 Wapi kizizi ya kitoko ya Klisto, Yandi yina kuwaka na Mazulu ti beto vwandaka ya kuzimbana mpe kwizaka mpe landaka mbeni, nzila nyonso tii na difelo, mpe kangaka myoyo ya kuzimbana mpe vutulaka beto mpe nataka beto na nyonso yina vwandaka na beto ntete kubwa! Beto, ba-retrograde, beto bayina kubutamaka na kuvwanda bana ya babakala ya Nzambi, ya balukaka na bana ya babakala ya dyabulu, mpe ya kusala . . . kwendaka na manima ya bima ya yinza, mpe salaka yimbi, mpe landaka mbongo mutindu Lot salaka, na kutekaka bukuluntu ya beto mpe na kukwendaka na manima ya bima ya yinza. Klisto kulumukaka. Ata kubwa; Nzambi, kuzabaka na mbandukulu nani zolaka kuzwa mpulusu mpe nani zolaka ve, na yawu me kulumuka mpe me landa mbeni na luzingu, na lufwa, na paladiso, tii na difelo. Mpe nzila nyonso na Nkembo tii na difelo, mpe yalaka mangolo ya difelo, mpe botolaka bafungula na dyabulu, mpe vumbukaka dyaka, mpe me vutula na bantu, ti bawu lenda vwanda dyaka bana ya babakala mpe bana ya bakento ya Nzambi.

61 Beno me mona Mpeve na kati ya Abraham kuna, Mpeve ya Klisto kuvwanda na yandi?

62 Ntangu yayi mu zola beno kutala mwa ntama, na yina beto ke tanga.

Mpe ntinu ya Sodome kubasikaka na kukutana yandi na manima yandi vutukaka na kununga ntinu yayi Kedorlaomer, mpe . . . bantinu . . . vwandaka na yandi, na kiwanda ya Schavé, yina kele kiwanda ya ntinu.

63 Bawu basikaka. Ba vutulaka ntinu ya Sodome. Ba vutulaka mpangi ya yandi ya bakala. Ba vutulaka bana. Mpe awa basikaka bantinu samu na kukutana yandi. Mpe, dyaka, awa kele kisika mu zola kukuma, nsangu ntangu yayi. Beno tala mbote awa.

Mpe—mpe Melchisédek, ntinu ya Salem (Ntinu ya Jérusalem, Ntinu ya ngemba) basisaka dimpa mpe vinu: mpe yandi vwandaka nganga-Nzambi ya Nzambi ya zulu mingi.

Mpe yandi sakumunaka yandi, mpe tubaka, Ya kusakumuna kele Abraham na Nzambi ya zulu mingi, mfumu ya mazulu mpe ntoto:

⁶⁴ Melchisédek, Ntinu ya Salem, me zabakana mpe Yandi mosi na kati-kati ya bantinu yankaka. Mpe beno tala, bitumba kumanisaka, Mpeve ya Nzambi na kati ya Abraham, ya Klisto, yina vutulaka mpangi ya yandi yina kubwaka, na manima me vutula yandi na mutindu ya yandi ya kulunga, na nyonso yina yandi zimbisaka. Yandi vutulaka yawu. Mpe na yina yandi salaka, Yandi basisaka dimpa mpe vinu, kominyo. Beno lenda mona ve Nani Melchisédek yina vwandaka? Ya vwandaka Nzambi. Me basisa kominyo, na manima ya bitumba.

⁶⁵ Ntangu yayi ti beto baluka dyaka, na Matthieu 26:26, na nswalu kaka, mpe kumona yina Yesu tubaka awa samu na yawu. Na Buku ya Matthieu, kapu ya 26 mpe dyaka nzila ya 26, beto zola kutanga kaka awa mwa fyoti. Mbote mingi, Matthieu 26:26.

Kuna me kwiza Yesu na bawu na kisika ba ke bokilaka Golgotha, Golgotha, to, Gethsémané, (Mu zola kutuba,) mpe tubaka na bilandi ya yandi, Beno vwanda awa, na yina mu ke kwenda kuna na kusambila.

⁶⁶ Mu banza ti mu ke na Masonuku ya yimbi. Matthieu, makumi zo- . . . nzila ya 26 ya kapu ya 26. Kana muntu me kuzwa yawu, beno tanga yawu samu na munu, kana beno—kana beno lenda tala yawu. Minuti kaka. Yayi kele kifwanusu ya kitoko awa. Mu zola ve ti beno kukondwa yawu. Beto bawu yayi. Ya kele yawu, mpangi ya kento.

Mpe na yina bawu vwandaka kudia, Yesu bakaka dimpa, mpe yandi sakumunaka yawu, . . .

Yinki ya vwandaka? Bitumba me manisaka.

. . . me buka yawu, mpe me pesa yawu na bilandi ya yandi, mpe me tuba, Beno baka, mpe beno kudia; yayi kele nzutu ya munu.

⁶⁷ Beno me mona Melchisédek yango? Bankama ya bamvula na ntwala, ntangu Yandi kutanaka na Abraham, na manima bitumba manisaka, Yandi pesaka dimpa mpe vinu. Mpe awa Yesu me pesa na bilandi, na manima bitumba ya Yandi ya ngolo kumanisaka, Yandi pesaka bawu dimpa mpe vinu. Beno tala mbote. Beno tala mbote Nkwizulu ya bilumbu na ntwala.

Mpe yandi bakaka mbungu, mpe—mpe vutulaka matondo, mpe pesaka yawu na bawu, na kutubaka, Beno kunwa yawu beno nyonso;

Samu ti yayi kele menga ya munu ya ngwisani ya malu-malu, yina basikaka samu. . . masumu mpe lemvo ya masumu.

Kasi mu ke tuba na beno, mu ke kunwa dyaka ve katuka ntangu yayi mbuma ya vinu, tii kilumbu yina mu ke kunwa vinu ya malu-malu kintwadi na beno na kati ya kimfumu ya Tata ya munu.

68 Beto kele na kati ya bitumba ntangu yayi. Beto ke na sosa mpangi ya beto ya bakala yina kubwaka, yina Nzambi, ntete mbandukulu ya yinza, monaka mpe solaka na Luzingu ya Kukonda nsuka. Mpe bima ya yinza me simba yandi na kati ya kitembo. Yandi ke vwanda na bimvuka mpe bakalasi, yandi mpe kento ya yandi, na kumataka mpe kukulumukaka babala-bala, na kunwaka tabaka mpe kunwaka mpe kuyitukisa, na kumekaka na kuzwa ngemba. Mpe Mpeve ya Klisto na kati ya beto, mutindu Ya zolaka vwanda na Abraham, beto ke kwenda na kusosa yandi. Na binwanunu nyonso ya Nzambi, na Bawanzio ya Nzambi ya kuvwanda pene, beto ke kwenda na kuvutula mpangi ya beto yina kubwaka.

69 Mpe ntangu bitumba kieleka ke suka, beto ke kutana dyaka na Melchisédek, Nzambi ya kusakumuna, Yandi yina sakumunaka Abraham kuna, mpe yina pesaka yandi lusakumunu, mpe pesaka yandi dimpa mpe vinu, kominyo. Mpe ntangu bitumba ke manisa, beto ke kutana na Yandi. Beto bayina kele bibyadi ya nsilulu ya Abraham, ke vukana bibyadi na Klisto na Kimfumu, ke kutana na Yandi na nsuka ya nzila, mpe ke baka dimpa mpe vinu, dyaka, ntangu bitumba ke manisa.

70 Nani kele Melchisédek yayi? “Yandi yina kuzwaka ve tata, kuzwaka ve mama, kuzwaka ve mbandukulu ya bilumbu to nsuka ya luzingu.” Yandi ke vwanda dyaka Kuna samu na kupesa kominyo. Beno me bakula yawu?

71 Ntangu beto ke belamaka, bankokila yankaka, ntangu beto ke kwizaka kintwadi mpe ke bakaka kominyo na maboko ya milongi, ya ke lakisa ti beto ke kwikilaka na lufwa, luzikulu, mpe mvumbukulu ya Mfumu Yesu, ti vwale yina, nzutu ya Yandi ti Yandi vwandaka ya kufuka na kati, Nzambi, beto ke baka yawu, mutindu kifwanusu ti, “Beto kele ya kufwa na bima ya yinza, mpe me butama ya malu-malu na Mpeve.” Mpe beto ke tambula na Nzutu ya Klisto, beto mikwikidi nyonso kintwadi.

72 Ntangu bitumba ya nene ke manisa, mpe beto ke kwizaka dyaka na Klisto, beto ke baka kominyo na Yandi na Kimfumu ya Nzambi, mbala mosi dyaka; mpe kudya nsuni, mpe kunwa menga na mbuma ya vinu dyaka, na Kimfumu ya Nzambi. Oh! Beno tala Melchisédek. Ya kele Yina Yandi vwandaka.

73 Ntangu yayi beto tanga kaka mwa ntama na yina me tala Yandi awa, mpe nzila ya 18.

Mpe Melchisédek ntinu ya Salem basisaka dimpa mpe vinu: . . . (Beno ke bakula yawu?) . . . mpe yandi vwandaka nganza-Nzambi ya Nzambi ya zulu mingi.

Mpe yandi sakumunaka yandi, mpe tubaka, Ya kusakumuna kele Abraham na Nzambi ya zulu mingi, mfumu ya mazulu mpe ntoto:

Mpe yandi sakumunaka yandi, . . . Mpe yandi sakumunaka . . .

Mpe lusakumunu vwanda na Nzambi ya zulu mingi, yina me kaba bambeni ya nge na maboko ya nge. Mpe yandi pesaka yandi kumi ya nionso.

Yandi futaka mosi ya kumi na Melchisédek. Abraham pesaka Yandi kumi ya bima yandi kuzwaka.

⁷⁴ Ntangu yayi mu zola beno kutala awa mutindu Paul ke na kulandila, na kupesaka dibanza na leso yina ke na kwiza ntangu yayi.

Mpe ntinu ya Sodome me tuba na Abraham, Pesa munu bantu, mpe kuzwa ya nge bimvwama samu na nge.

Ntangu yayi, ntinu ya Sodome tubaka, “Ntangu yayi, pesa munu kaka bantu ya munu, mpe nge baka bimvwama samu na nge.”

Mpe Abraham me tuba na ntinu ya Sodome, mu me telemisa diboko ya munu na ntuala ya MFUMU, Nzambi ya zulu mingi, . . .

El Elyon, “mfumu ya mazulu mpe ntoto,” kuna.

. . . Nzambi ya zulu mingi, mfumu ya mazulu mpe ntoto,

Ti mu ke baka mpe ve singa tii singa ya dipapa, . . .

Yandi kuzwaka ve campagne ya nene samu na kuzwa mbongo. Yandi vwanda sosa kaka mpangi ya yandi yina kubwaka.

. . . mpe ti mu ke baka ve kima mosi ya nge, samu ti nge ke tuba ve, Mu me kumisa Abraham mvwama:

Tanga kaka yina bantwenya me kudya, mpe ndambu ya bantu yina kwendaka na munu, . . .

⁷⁵ Ntangu yayi, mu zola beno kutala, Abraham tubaka, “Mu ke baka kima mosi ve tii singa ya dipapa.” Yandi nwanaka ve mvita, samu na kusala mbongo mingi. Mpe kieleka bitumba ya kieleka ke salamaka ve na bamitifi ya munimi. Ba ke nwanaka ve bamvita samu na mbongo. Ba ke nwanaka bamvita samu—samu na bamitifi, samu na misiku. Bantu ke nwaka mvita samu na misiku. Mpe ntangu Abraham kwendaka samu na kuzwa Lot, yandi kwendaka ve samu ti yandi zabaka ti yandi lendaka bula bantinu mpe kubaka bima nyonso ya bawu, yandi kwendaka na musiku ya “kuvuukisa mpangi ya yandi ya bakala.”

⁷⁶ Mpe mulongi nyonso yina me kwenda na yisi ya lutwadusu ya kimpeve ya Ntinu ya Mazulu, ke kwenda ve samu na mbongo; to dyaka ti yandi ke kwenda na kusala mabuundu ya nene, to dyaka ti yandi ke kwenda na kupesa dibanza ya ba-dénomination. Yandi ke kwenda kaka samu na musiku mosi, mpe ya kele, “Kuvutula mpangi ya yandi ya bakala ya kubwa.” Kana yandi kuzwa mbongo ya ba-cents kumi na munkayulu to kana yandi kuzwa ve, ya ke sala ata fyoti ve ya luswaswanu samu na yandi.

⁷⁷ Mutindu mu me tuba, “Ba ke nwanaka bamvita ya kieleka mpe samu na kunwanila misiku mpe samu na mbongo ve.” Mpe babakala mpe bakento yina ke kuma ya dibuundu mpe ke kwiza na dibuundu, samu na kuvwanda ya kuzabana, samu ti *ba-Jone* kele kuna, to ba ke soba dibuundu ya bawu na dibuundu ya fyoti na dibuundu ya nene, beno ke salaka yawu samu na mitifi ya munimi mpe musiku ya kieleka kele ve na manima ya yawu. Beno zolaka zola kuvwanda ya kutelama na ntwala ya bitumba.

⁷⁸ Na tabernacle yayi awa, ntangu mambu ke tambulaka mbote ve, mpe beno babakala mpe beno bakento ke kima mpe ke kwenda bisika yankaka, to ke vwanda na lweka tii mwa kuswana yango to movusu ke manisa, ya kele na kima mosi ya yimbi na kimbangi ya beno. Kieleka.

⁷⁹ Beto ke na misiku awa. Beto ke—beto ke na lutumu awa. Dibundu yayi kele ya kuvwanda na zulu ya lufulu ya misiku ya Biblia. Kana ya kele na muntu na kati awa yina ke na salaka mbote ve, mpe beno banza ti yandi ke na kusalaka mbote ve, beno kwenda na yandi mpe zonza na yandi. Kana beno lenda ve na kuvutula yandi, na yina beno baka mpangi mosi na beno, mosi to zole dyaka. Kana kuna yandi zola ve kuvutuka na ngwisani, na yina beno tuba yawu na dibuundu. Mpe dibuundu ke katula yandi, ke bundana dyaka ve na yandi. Mpe Yesu tubaka, “Nyonso yina beno ke zibula na zulu ya ntoto, mu ke zibula na Mazulu.”

⁸⁰ Ya kele samu na yina beno ke kuzwaka bankwamusu mingi, samu beno ke landaka ve misiku ya Biblia. Kana muntu na dibuundu ke na kusalaka movusu, to kima mosi ya yimbi ke na kusalamaka, ya kele ve kisalu ya beno na kukwenda zonzila na muntu yina to kento yina. Ya kele kisalu ya beno na kukwenda na muntu yina to kento yina, mpe kutuba na yandi foti ya yandi. Mpe kana yandi zola ve kuwa beno, beno baka muntu mosi yankaka na beno. Kana yandi zola ve kuwa yawu, na yina dibuundu ke kanga yandi. Yesu tubaka, “Yina beno ke zibula na zulu ya ntoto, Mu ke zibula na Mazulu. Yina beno ke kanga na ntoto, Mu ke kanga na Mazulu.” Ya kele ngolo ya dibuundu.

⁸¹ Awa ntama mingi ve, nkundi ya munu mosi ya mulongi, yandi vwandaka na mwana ya bakala, mpe mwana yango ya bakala vwanda kwendaka na dibuundu, na dibuundu ya yandi. Yandi kumaka na kisika yandi bandaka na kutambula bisika na mwa mwana mosi ya kento yina vwanda kunwaka tabaka mpe kunwaka mpe vwandaka na ndyatulu ya yimbi. Mulongi tubaka, “Kieleka, ya kele dyambu ya yandi.” Mosi ya bankundi ya munu ya luzolo, mpe mwana ya bakala ya mbote. Kasi yandi kotaka yandi nyonso na luzolo na ntwenya mosi ya kento; mpe yandi vwandaka nkwelani, ya vwandaka na mwa bana, bakala ya yandi vwandaka moyo. Yandi vwandaka na boma ti bawu zolaka. . . ti mwana ya bakala yango zolaka kwela yandi. Na yawu, mpangi ya bakala vwandaka yandi nyonso kidi-kidi. Mpe yandi tubaka na munu, “Mpangi Branham, mu zola ti nge

kwenda na mwana ya munu ya bakala yayi *kingandi*. Mu zola nge kuzonza na yandi.”

⁸² Mu tubaka, “Mpangi . . .” Mu zolaka bokila nkumbu ya yandi. “Nge ke na mutindu ya kulutila mbote. Kufidisa munu ve. Kana mwana ya bakala yango ke na kuzinga na mutindu ya kulunga ve, mpe ti dibuundu me mona yandi kusala yimbi, na yina ya kele kima samu na dibuundu na kusala. Ya me tala dibuundu. Mpe dibuundu kwenda mpe tuba na yandi.”

⁸³ Na yawu yandi bakaka mpangi mosi ya bakala, mpe kwendaka kuna mpe tubaka na yandi. Mpe yandi vutulaka na mpangi ya bakala, ti yandi vwandaka landa mambu ya yandi mosi, ti yandi zolaka sala mutindu mosi. Yandi bakaka mpangi yankaka ya bakala, zole dyaka, badiakre zole kwendaka kuna mpe tubaka na mwana ya bakala. Yandi zolaka ve na kuwa. Bawu tubaka yawu na dibuundu. Mpe na manima ya bankokila mingi yandi kwizaka ve samu na kuvutuka na dibuundu na manima ba tubaka disumu ya yandi na ntwala ya dibuundu. Na yina, dibuundu zibulaka yandi.

⁸⁴ Mpe pene ya ngonda mosi na manima yandi kuzwaka pneumonie, mpe dokotolo tubaka, “Ya kele ve na siansi na yinza samu na yandi na kuzinga.” Na yina yandi vutukaka na kukomvulaka. Nzambi zaba mutindu ya kusala yawu.

⁸⁵ Beto ke meka na kusala yawu na mutindu ya beto mosi, “Oh, beno fwana losa *Kingandi* na ngaanda ya dibuundu. Beno fwana fwana sala *yayi, yina, to yankaka*.” Beno me sala kitini ya beno mutindu dibuundu na dyambu yango? Beno bawu yayi. Ya kele mutindu ya kusala bawu kuvutuka na kukomvulaka, beno pesa bawu mbala mosi na dyabulu.

⁸⁶ Yinki Paul tubaka na yina me tala bakala yayi kuna yina vwanda zinga na kento ya tata ya yandi? Bawu vwanda lenda ve na kuvutula yandi na ngwisani. Yandi tubaka, “Beno pesa yandi na dyabulu.” Beno tala mbote yina ke salama. Mpe na mukanda yina ke landa Paul sonikaka, ti bakala yayi kusungamaka. Kieleka. Nzambi ke na mutindu ya kusala bima yayi, kana beto landa kaka misiku ya Yandi.

⁸⁷ Kana dyambu ke tambula yimbi na dibuundu, kana ya kele na kati-kati ya dibuundu, mosi na mosi ya beno bampangi. Kana na kimvuka ya badiakre, mosi ya beno badiakre ke na kudyata mbote ve, badiakre yankaka ke kwiza mpe ke kuzwa lukutakanu, na kumekaka na kuvutula na ngwisani mpangi ya bakala, beno tuba na yandi yina yandi ke na kusalaka; to mosi ya beno bamambele, to nani beno kele. Kuna ya ke natama na ntwala ya yandi. Kana yandi zola kusala yawu ve, na yina beno tuba na pasteur. Na manima, dibuundu ke zibula yandi, mpe kuna ti yandi vwanda mutindu mumpani mpe mufutisi-mpaku. Na manima beno tala mbote Mfumu kulandila na kusala na yandi. Beno me mona, ya kele ntangu yandi ke vutuka na yandi

mosi. Ya kele ntangu yandi ke komvula na kukotaka. Kasi beto ke mekaka na kusala yawu beto mosi, beno zaba, na kumekaka na kusala. . . nyonso mutindu beto zolaka sala yawu, ntangu yayi, ata mbala mosi ve ti beto ke kwenda na ntwala.

⁸⁸ Ntangu yayi, Melchisédek yayi, Ntinu ya Salem, Mwana ya ntinu ya bakala, Nganga-Nzambi ya Zulu Mingi, kutanaka na Abraham mpe sakumunaka yandi. Mpe pesaka Yandi bikunku ya kumi, Abraham salaka. Mpe Yandi vwandaka Ntinu ya Salem. Mpe Yandi basisaka dimpa mpe vinu, kominyo, mpe pesaka yawu na Abraham na manima ya bitumba, na manima ya kuzwa bantu.

⁸⁹ Ntangu yayi, “Bamvita nyonso,” mutindu mu vwandaka me tuba, “kele samu na kunwanila misiku.” Ntangu yayi, kana beno kele na mwa mvita na dibuundu, ya fwana vwanda musiku ya kulunga. Beno fwana nwana samu na kima ya kulunga. Mpe mambele nyonso ya dibuundu zolaka sala yawu. Ntangu yayi, malongi yayi kele samu na dibuundu. Ya kele samu na yina beto kele awa. Ya kele samu na yina mu kele ya kutelama awa. Ya kele samu na yina Ndinga ya Nzambi kele, ya kele samu na dibuundu.

⁹⁰ Beno bika ata mbala mosi ve kima mosi kukanga nzila na dibuundu yayi. Kana ya salama, beno ke zaba dyambu, mosi na mosi ya beno. Mpe beno, na mabuundu ya beno ya mutindu na mutindu, kana kima ke na kutambula yimbi na dibuundu ya beno, beno ke zaba dyambu, samu ti beno kele mukengi ya dibuundu yango. Ya me tala pasteur ve. Ya me tala kimvuka ya badiakre ve. Ya me tala beno, beno mosi, na kukwenda na mpangi yango mpe kumona kana beno lenda vutula yandi na ngwisani. Kana ve, kuna beno baka bantu zole to tatu na beno, mpe beno vutuka. Kana yandi zola kuwa yawu ve, beno tuba yawu na dibuundu. Kuna ba ke katula yandi na Kimfumu ya Nzambi. Nzambi tubaka, “Kana beno katula yandi kuna, Mu ke katula yandi Awa, kana beno lutila na lutumu yayi.” Na yina Yandi ke bika dyabulu na zulu ya yandi samu na ntungulu. . . kubeba ya nsuni ya yandi. Mpe na manima yandi ke vutuka. Ya kele kieleka. Ya kele mutindu ya kusala yandi kuvutuka. Kana yandi kele mwana ya Nzambi, yandi ke vutuka. Kana yandi kele ve, mbote—mbote, yandi ke landila, mpe na manima dyabulu ke fidisa yandi na kisika ya yandi ya Seko.

⁹¹ Ntangu yayi, bamitifi ya yawu. Kana beno ke dasukila kaka muntu mosi, kuna ya kele mutindu yankaka. Kasi, kana muntu zaba dyambu! Mpe Lot kwendaka kuna mpe vutukaka manima, ata ti yandi vwandaka Hébreux. Yandi kwendaka kuna mpe vutukaka manima. Yandi vwandaka na kati ya lemvo, kasi yandi kubwaka na yawu. Mpe na yina yandi basikaka. . . Mpe Lot—Lot vuukaka. Beno banza ata mbala mosi ve ti Lot vuukaka ve. Yandi vuukaka. Samu ti, ntangu nyonso ntangu yandi vwandaka na kisika ya yimbi, Biblia ke tuba, ti, “Masumu ya Sodome vwanda nyongisa moyo ya yandi ya kusungama konso kilumbu.”

Ntangu yayi, nzutu ya yandi vwandaka sala kima mosi. Mpe yinki vwandaka nsuka ya yandi? Yandi nataka nsoni mingi. Kento ya yandi kitukaka dikunzi ya mungwa. Yandi kuzwaka bana na nzila ya bana ya yandi ya bakento. Na yawu, beno lenda mona wapi nsoni ya nataka, samu ti yandi kubwaka na lemvo mpe yandi vutukaka ata mbala mosi dyaka ve. Mpe Nzambi zolaka katula yandi na ntoto.

⁹² Kasi, dyaka, yandi vwandaka mpangi ya bakala ya kubwa, mpe Abraham salaka nyonso yina yandi lendaka sala na kuvutula dyaka yandi. Mpe Mpeve yina vwandaka na kati ya Abraham, kele Mpeve ya Klisto yina kele na kati ya dibuundu bubu yayi. Ata nyonso yina mpangi me sala, beno ke sala nyonso beno lenda samu na kuvutula dyaka yandi na kati ya kubundana ya Klisto. Ata nyonso yina yandi ke sala, beno ke meka na ngolo.

⁹³ Ntangu yayi, beto zola kutala awa ntangu yayi dyaka, na yina beto ke landila na lesu yayi ya Melchisédek yayi, nganga-Nzambi ya nene yayi ya Salem, mpe mfumu ya Mazulu mpe ntoto. Ntangu yayi, na kuvwandaka ntete:

Ya kukondwa tata, ya kukondwa mama, ya kukondwa lubutuku, to dyaka ve mbandukulu ya bilumbu, to nsuka ya luzingu; kasi vwandaka ya kusala mutindu na Mwana ya Nzambi; ke landila na kuvwanda nganga-Nzambi ntangu nyonso.

Ntangu yayi beno tala mbote. Yandi vwandaka ve Mwana ya Nzambi, Yandi vwandaka Nzambi ya Mwana. Yandi vwandaka ve Mwana ya Nzambi, Melchisédek vwandaka ve, kasi Yandi vwandaka Tata ya Mwana ya Nzambi.

⁹⁴ Ntangu yayi, nzutu yayi yina Yandi kuzwaka, Yandi vangaka yawu. Ya basikaka ve na nzila ya kento mosi. Na yawu na nzutu yango ya kuvanga, Yandi zolaka ve. . . Nzutu mosi yina Yandi salaka, Yandi mosi, samu na kumonikisa Yandi mosi.

“Muntu ve lenda mona Nzambi ata mbala mosi. Nzambi kele mpeve.” Meso yina ke kufwa ke mona ve bima yango, kana ti ya kele na mutindu ya Dikunzi ya Tiya, to ata nyonso yina ya vwandaka, to na mutindu ya moyo mosi yina bawu ke mona na nzila ya vision. Kasi. . . Nzambi fwana monikisa Yandi mosi na nzila ya nzila mosi. Mpe Nzambi monikisaka Yandi mosi na Abraham, na mutindu ya muntu. Yandi monikisaka Yandi mosi na Moïse, na mutindu ya muntu. Yandi monikisaka Yandi mosi na bana ya Israël, na mutindu ya Dikunzi ya Tiya. Yandi monikisaka Yandi mosi na Jean-Baptiste, na mutindu ya yembe. Beno me mona, Yandi monikisaka Yandi mosi na mitindu yango.

Ntangu Yandi vwandaka monikisaka Yandi mosi na mutindu ya Muntu, mutindu Ntinu ya Salem; ya Jérusalem; Jérusalem ya ntoto ve, kasi Jérusalem ya Mazulu. Yandi monikisaka Yandi mosi na mutindu yina. Yandi vwandaka ya kusala “mutindu na” Mwana ya Nzambi.

95 Ntangu yayi, Mwana ya Nzambi zolaka kwiza na kulutaka na kento, samu na kuvangama awa; na nzila ya kivumu ya kento, samu ti na nzila ya kima yango mosi me kwiza lufwa.

96 Mpe Yandi zolaka kwiza ve na nzila ya ngidikulu mutindu Nzambi salaka na mbandukulu. Ntangu Nzambi salaka bakala na mbandukulu, kento vwandaka ve na kima ya kusala na yawu. Nzambi tubaka kaka, “Ti ya vwanda,” mpe bakala basikaka na fundu-fundu. Yandi bokilaka yandi, kukondwa kento mosi kuzwa kima ya kusala na yawu. Kasi, kento, yandi kuna vwandaka na kati ya bakala.

97 Mpe Nzambi basisaka kento na lweka ya Adam. Ya kele kieleka? Mpe kuna kento kwendaka mpe butaka muntu na nzila ya kuvukisaka banzutu. Na yawu mutindu kaka yina Nzambi zolaka sala . . . Yandi zolaka kota ve na théophanie yina. Yandi zolaka kwiza ve mutindu Melchisédek. Yandi zolaka kwiza mutindu Muntu, mpe Yandi zolaka kwizaka na kulutilaka na kento. “Nkuna ya Nge ke nika yintu ya nyoka, mpe yintu ya yandi ke lwadisa dikulu ya Nge.” Beno me bakula yawu? Nzambi zolaka kwiza na nzila ya kento; mpe Yandi salaka, ntangu Yandi zingaka na nzutu ya Yandi ya Mwana ya Yandi, Klisto Yesu. “Nzambi vwandaka kati na Klisto, samu na kuvutula ngwisani na kati ya yinza na Yandi mosi.” Mpe Yandi pesaka Menga ya Yandi mosi mutindu munkayulu. Mpe pesaka Luzingu ya Yandi, ti na nzila ya nzila ya lufwa, Yandi lendaka vuukisa beno tii Luzingu ya Kukonda nsuka.

98 Na yawu Nzambi kwizaka kuna, mpe Yandi vwandaka ya kusala “mutindu na” Mwana ya Nzambi. Beno me mona? Yandi vwandaka Muntu ya kusala *mutindu* Mwana ya Nzambi. Ntangu yayi, Yandi zolaka vwanda ve Mwana ya Nzambi, samu ti Muntu yayi kele Seko.

99 Mwana ya Nzambi kuzwaka mbandukulu, Yandi kuzwaka nsuka. Yandi kuzwaka ntangu ya lubutuku ya Yandi, Yandi kuzwaka ntangu ya lufwa ya Yandi. Yandi kuzwaka nyonso zole mbandukulu mpe nsuka. Yandi kuzwaka nyonso zole tata mpe mama.

100 Muntu yayi kuzwaka ve tata to mama, mbandukulu to nsuka ya ntangu. Kasi Yandi vwandaka ya kusala, Muntu yayi, Melchisédek, vwandaka ya kusala *mutindu* Mwana ya Nzambi.

101 Ntangu yayi, Mwana ya Nzambi, na yina yandi kwizaka na yinza, na mutindu ya kento, to, na nzila ya kento, na mutindu ya muntu, mpe ba kufwaka Yandi, vumbukaka dyaka na kilumbu ya tatu, vumbukaka samu na lunungu ya beto, ntangu yayi Yandi ke zinga ntangu nyonso. Mpe ntangu nyonso yina ti nzutu yina ke zinga, beto mpe ke zinga. Mpe samu ti Yandi vumbukaka na fundu-fundu, beto ke vumbuka na mutindu ya Yandi. Yawu yayi disolo ya Nsangu ya mbote. Lusakumunu na Nkumbu ya Mfumu. Ve Bawanzio, ve bantu ya kimpeve, ve ya kufuluka na mapapu

samu na kubula kintwadi, kasi babakala mpe bakento, amen, kutelama na mutindu ya Yandi. Yinga, tata.

¹⁰² Mutindu mu ke tubaka yawu mbala mingi, mu ke tuba dyaka yawu awa na ntangu yayi. Ya ke monana ya kulunga. Mu vwanda sanula, pene ya bansuki tanu to sambanu yayi yina me bikana na munu. Mpe kento ya munu tubaka, “Billy, nge ke na kukuma na dibasi.”

¹⁰³ Mu tubaka, “Kasi mu me zimbisa ata mosi ya yawu ve.”

¹⁰⁴ Yandi tubaka, “Wapi kisika ya kele?”

¹⁰⁵ Mu tubaka, “Tuba na munu kisika ya vwandaka ntete mu kuzwa yawu, mu ke tuba na nge kisika ya ke na kuingilaka munu.” Ya kele kieleka.

¹⁰⁶ Mu vwanda vwanda kinwani-makofi, pugiliste. Mu vwanda na ngolo mpe nene. Mpe mu vwanda tala, kana beno tula dibuundu yayi na mukongo ya munu, mu ke kulumuka bala-bala na yawu. Mu ke tuba na beno, ntangu mu ke vumbukaka konso suka ntangu yayi, mu ke bakula ti ya kele na bamvula makumi yiya na kima me luta. Beno me mona? Mu kele ve yina mu vwanda vwandaka. Mu ke na kulembaka, konso kilumbu. Mutindu mu ke tala maboko ya munu mpe ke banza, “Tala awa. Mbote, mu ke na kukumaka kiboba ya bakala.” Mu ke tala mapeka ya munu. Mu ke mona ti mu me bwela kilo mingi. Mu vwandaka lwata mukaba ya ba-centimetre makumi sambwadi. Bubuy yayi mu ke na kulwata ya ba-centimetre makumi sambwadi na tanu. Beno me mona, mu ke na kukuma kiboba, nene, ke na kulemba.

¹⁰⁷ Yinki ya kele? Mu ke na kudyaka kima mosi yina mu vwanda kudyaka. Mu ke zinga ya kutsyema mpe mbote mingi kulutula ntangu mu vwanda zinga, kima mutindu mosi. Kasi Nzambi me kubika ntangu samu na munu, mpe mu fwana kuzwa yawu. Kasi dibanza ya kusakumuna kele, ti, na kilumbu yina, Yandi ke vumbula munu dyaka. Mpe nyonso yina mu vwandaka ntangu mu vwandaka na bamvula makumi zole na tanu, mu ke vwanda dyaka yawu kukondwa nsuka. Amen. Beno bawu yayi. Yinki buboba ke kwamisa munu? Mu ke bika ve dyabulu kubula munu samu na yawu bamvula mpe bamvula, na kuzabaka yayi, ti mu ke kwikila Yandi. Mwa kati-kati ya ntangu yayi kele kaka mwa, kima ya nkufi, na mutindu nyonso. Kana beto ke vwanda tii bamvula makumi sambwadi, ntangu yina ba silaka beto, tii bamvula makumi sambwadi, yinki—yinki ya kele ti kasi mpasi mpe mawa? Yinki ya kele? Beno zola ve kusobisa yinzo ya kubela yayi samu na kima ya nkembo yina kuna?

¹⁰⁸ Mbote, lusakumunu na Nkumbu ya Mfumu! Kima mosi na kati ya munu kutanaka Melchisédek yango kilumbu mosi, mpe Yandi zonzaka ngemba na munu mpe Yandi me pesa munu Luzingu ya Kukonda nsuka. Mpe luzingu yayi zola kutuba kima mosi ve kasi tabernacle na kulongila Nsangu ya mbote. Mu ke tuba yayi na makieleka nyonso, na Babibilia zole yayi

ya kufunguka na ntwala ya munu. Kana Nzambi ya munu vwandaka me luta na munu na kulonga Nsangu ya mbote, mpe ti mu zolaka sala dyaka ve samu na Yandi, ti bana ya munu vwandaka ya kukula mingi samu na kukipe bawu mosi, mpe ti Yandi zola kubaka munu ntangu kaka yayi, “Amen,” yina ke sukisa dyambu. Yinga, tata.

¹⁰⁹ Wapi luswaswanu ya ke sala kana mu kele na bamvula makumi nana to kana mu kele na makumi zole? Mu kele kaka awa samu na kima mosi: samu na kusadila Mfumu. Kaka yina. Kana mu lenda dyaka kulonga Nsangu ya mbote mutindu mu ke sala ntangu yayi, na yina mu kele na bamvula makumi nana, wapi luswaswanu ya ke sala kana mu kele na bamvula makumi yiya to makumi nana? Ya kele na bantu mingi ya bamvula makumi nana na nkokila yayi. Mpe ya kele na bana mingi ke kufwa, na yina bakala ya kiboba ya bamvula makumi nana ke zinga dyaka mingi ya mosi ya bawu. Wapi luswaswanu ya ke sala? Ya kele bamitifi ya beno, misiku ya beno, mpe beto kele awa samu na kusadila Mfumu Yesu. Kaka yina.

¹¹⁰ Na kuzabaka yayi, ti, “Luzingu yayi kele mupepe yina muntu ke zonzila; yina vwandaka kilumbu, mpe na manima kele ve.” Kasi kana beto kuzwaka Luzingu ya Kukonda nsuka, Nzambi silaka ti Yandi ke vumbula dyaka beto. Mpe beto ke baka kominyo na Yandi ntangu bilumbu ke suka, mpe ntangu Yandi ke tuba, “Kota na kati ya bakyese ya Mfumu, yina ba kubikaka samu na nge kubanda mbandukulu ya yinza.”

¹¹¹ Na yina wapi luswaswanu ya ke sala awa, kana beto kuzwa kima to kana beto kuzwa ve? Kana beto kele ntwenya to kana beto kele kiboba, wapi luswaswanu ya ke sala? Kima ya ngundi, beno kele ya kuyilama samu na kukutana na Yandi? Beno zola Yandi? Beno lenda kusadila Yandi? Beno me bika bima ya yinza? Beno me kutana na Melchisédek ntangu bitumba kusukaka?

¹¹² Nkembo na Nzambi! Mu vwandaka, pene ya bamvula makumi zole na mosi, mpe kilumbu mosi mu kuzwaka bitumba na *yayi*, *yina*, mpe *yankaka*. Mu vwanda lenda ve kubaka lukanu kana mu zolaka kuvwanda kinwani-makofi, to kana mu zolaka kuvwanda musimbi, to muzombi, yina mu zola kuvwanda. Kasi mu kutanaka na Melchisédek, mpe Yandi pesaka munu kominyo, mpe katuka kuna dyambu sukaka kukondwa nsuka. Alleluia! Mu kwendaka na lweka ya Yandi. Mu vwanda sepela na nzila. Mpe ntangu ya ke kuma na nsuka ya nzila, mpe ti lufwa ke tala munu na kizizi, kana mu kuwa mutindu ntangu yayi, mu ke kima yawu ata mbala mosi ve. Mu ke belama, mu ke zola kutambula na kati ya kizizi ya yawu, na kuzabaka yayi, ti mu zaba ti Yandi Yina salaka nsilulu, yina kele kieleka, ti mu zaba Yandi na ngolo ya mvumbukulu ya Yandi. Ntangu Yandi ke bokila na kati-kati ya bantu ya kufwa mu ke basika na kati-kati ya bawu. Ya kele kieleka, na kuzabaka Yandi na ngolo ya mvumbukulu ya Yandi. Wapi luswaswanu ya ke sala, kana mu me nuna to kana mu kele

ntwenya? Kana mu kele fyoti to kana mu kele nene? Kana mu kele ya kifuluka to kana mu kele na nsatu? Kana mu kele na kisika ya kulala to kana mu kele na kisika ve?

¹¹³ “Bandeke kele na mazanza ya bawu, mpe mibaku kele na miswamunu, kasi Mwana ya muntu kele ve na kisika ya kutula yintu ya Yandi,” kasi Yandi vwandaka Ntinu ya Nkembo.

¹¹⁴ Beto kele bantinu mpe banganga-Nzambi na nkokila yayi. Wapi luswaswanu ya ke sala kana beto ke kuzwa to kana beto ke kuzwa ve? Ntangu nyonso yina beto kele na Nzambi, beto kele ya kulutila minungi. Beto kele ya kulutila minungi. Beto kele ya kuvwanda na Nvwandulu ya Nzambi, na kati ya kubundana ya Mpeve-Santu, na kubakaka kominyo na maboko ya Yandi yina pesaka kimbangi, “Mu vwandaka Yandi yina vwandaka ya kufwa, mpe kele moyo dyaka, mpe Mu kele moyo samu na ntangu nyonso.” Na kuvwandaka kintwadi na bisika ya Mazulu na kati ya Klisto Yesu. Oh, nkembo na Nkumbu ya Yandi ya Santu! Wapi luswaswanu ya ke sala?

Tenta to yinzo, samu na yinki mu ke kipe?

Ba ke na kutungila samu na munu yinzo ya mfumu na lweka Kuna!

Ya matadi ya ntalu mpe ya diamant, mpe ya palata mpe ya wolo,

Bansaduku ya Yandi kele ya kifuluka, Yandi kele na bimvwama yina ba lenda tanga ve.

¹¹⁵ Mu kutanaka na Yandi kilumbu mosi ntangu mu katukaka na bitumba. Mu tulaka na yisi bakuupe ya munu. Mu ke nwanaka dyaka ve bitumba katuka kuna; Yandi ke nwanaka yawu samu na munu. Mu ke pema kaka na zulu ya nsilulu ya Yandi, na kuzabaka yayi, ti mu zaba Yandi na ngolo ya mvumbukulu ya Yandi. Ya kele nyonso yina kele dyambu. Yinki yankaka kele dyambu?

¹¹⁶ Yinki beto lenda sala? Wapi mutindu na manyongo beno lenda bwela kilumbu mosi na ntela ya beno? Yinki beno ke kipe kana nsuki ya beno kele ya kubaluka, to kana beno kele na yawu to ve? Wapi luswaswanu ya ke sala? Kana beno kele kiboba, kana beno kele na bansuki mpembe, kana beno kele na mapeka ya kubwa, kana ve, wapi luswaswanu ya ke sala? Amen. Yayi kele kaka samu na ntangu mosi, samu na mwa kati-kati ya ntangu, kasi Yawu kele samu na kukondwa nsuka mpe kukondwa nsuka Mpe na yina ntangu yina ba lenda tanga ve ke na kuluta, mutindu bansungi ke na kuluta, beno ke soba ata mbala mosi ve, mpe beno ke lutila na bansungi ya Yandi ya Seko yina ke sukaka ve. Wapi luswaswanu ya ke sala?

¹¹⁷ Mu ke na kyese mingi ti mu kutanaka na Yandi. Mu ke na kyese mingi ti Yandi me pesa munu kominyo, kilumbu mosi, Melchisédek yango mosi yina kutanaka Abraham na kuvutukaka na bitumba yina yandi nungaka bantinu. Kieleka. “Nzambi ya

Mazulu,” *El Elyon*; ya nene “MU KELE,” ve Mu vwandaka; MU KELE, ntangu ya bubu yayi. “Mpe Yandi sakumunaka yandi.”

118 Beno kuwa awa kaka mwa ntama mingi, na yina beto lenda kota mwa mingi kintwadi na lesu. Ntangu yayi nzila ya 4.

Ntangu yayi beno tala mutindu mfunu muntu yayi vwandaka, . . .

Munu mpe, ke banza kaka na yawu. “Beno tala mutindu mfunu Muntu yayi vwandaka.” Yandi kele ya kulutila Mwana ya Nzambi. Mwana ya Nzambi kuzwaka tata mpe mama; Yandi ve. Mwana ya Nzambi kuzwaka mbandukulu ya ntangu mpe nsuka ya ntangu; Yandi ve. Nani ya vwandaka? Ya vwandaka Tata ya Mwana. Ya kele Yina Yandi vwandaka.

. . . beno tala mutindu mfunu muntu yayi vwandaka, na . . . mpe nkooko Abraham pesaka mosi ya kumi ya bima nyonso yandi kuzwaka.

119 Ntangu yayi beno kuwa mbote.

Mpe kieleka bawu yina kele bana ya Levi, bayina me kuzwa kisalu ya kinganga-Nzambi, kele . . . lutumu na kubaka kufuta ya bikunku ya kumi ya bantu landila musiku, yina kele, na bampangi ya bawu, ata ti bawu me basikaka na menga ya Abraham:

120 Ntangu yayi beno tala mbote yayi kana beno zola kumona kima mosi.

Kasi yandi yina dikanda kele ve ya kulanda samu . . . na bawu kuzwaka bikunku ya kumi na Abraham, mpe sakumunaka yandi yina kuzwaka nsilulu.

121 Abraham kuzwaka nsilulu, mpe Muntu yayi sakumunaka Abraham yina kuzwaka nsilulu. Nani vwandaka yayi? Bana ya Levi kufutaka bikunku ya kumi na bampangi ya bawu to. . . Bampangi ya bawu kufutaka bikunku ya kumi na bawu. Bawu kuzwaka lutumu ya Mfumu na kubaka ya kumi ya yina bampangi ya bawu kusalaka, samu na kuzinga ya bawu, samu ti bawu vwandaka kinganga-Nzambi. Ntangu yayi, yina ke katula kinganga-Nzambi ya Melchisédek, mutindu beno ke zonzila, kaka kuna. Ya kele kieleka. Kasi Muntu yayi . . . Mpe muntu yina kuzwaka nsilulu, muntu ya kulutila nene na ntoto, Abraham, kutanaka na Muntu yayi mpe futaka bikunku ya kumi na Yandi. [Kisika ya mpamba na bande—Mu.] Yandi zolaka vwanda ya kulutila nene.

122 Beno kuwa.

Mpe kukondwa ntembe mosi ya yisi kele ya kusakumuna na ya zulu.

Kieleka. Beno tala mbote Nani Yandi kele.

Mpe awa bantu yina ke kufwa ke kuzwa bikunku kumi; . . .

Ya kele lutumu ya kinganga ya banganga-Nzambi mpe milongi, mpe nyonso yankaka. Bantu yina ke kuzwaka mosi ya kumi, ke kufwaka. Benomo me mona?

... kasi awa yandi kuzwaka yawu, yandi yina ya kele kimbangi ti yandi kele moyo.

¹²³ Samu na yinki muntu ke baka kufuta ya bikunku ya kumi, kana yandi kuzwaka ata... Kana yandi butamaka ata mbala mosi ve, mpe ke kufwa ata mbala mosi ve, mpe vwandaka na mbandukulu tii nsuka, mpe—mpe kuzwaka ata mbala mosi ve tata to mama to dikanda, mpe kele ya kuzwa Mazulu nyonso mpe ntoto mpe nyonso na yawu, samu na yinki yandi ke baka mosi ya kumi? Samu na yinki yandi ke lomba na Abraham na kufuta bikunku ya kumi? Benomo me mona wapi mutindu ya kele kima ya mpamba ve na kufuta bikunku ya kumi? Kufuta mosi ya kumi kele ya kulunga. Konso Muklisto fwana futa mosi ya kumi. Ya kele kieleka. Ata mbala mosi ve ti ya me sobaka.

¹²⁴ Ntangu yayi:

Mpe mutindu mu lenda tuba dyaka, Levi mpe, yina kuzwaka mosi ya kumi, futaka bikunku ya kumi na kati ya Abraham.

¹²⁵ Ntangu yayi, oh, awa kele na kima mosi.

Samu ti yandi vwandaka ntete na kati ya menga ya tata ya yandi, ntangu Melchisédek kutanaka na yandi.

¹²⁶ Yinki? Levi? Abraham vwandaka nkooko ya nkooko ya nkooko ya bakala ya Levi. Mpe Biblia ke tuba awa, ti, “Levi futaka bikunku ya kumi ntangu yandi vwandaka na kati ya menga ya Abraham.” Bansungi yiya ntete yandi kwiza ntete na ntoto, yandi vwanza futa bikunku kumi na Melchisédek. Lusakumunu na Nkumbu ya Mfumu!

¹²⁷ Na yina, beno bayina lenda kwikila ve na nsodolo, to na nsodolo ya ntete; mpe awa, bansungi yiya ntete Levi kubasika na menga ya Abraham, yandi vwandaka futa bikunku kumi na Melchisédek. Kana beto zolaka kuzwa ntangu na kutala yayi na nzila ya Masonuku.

¹²⁸ Kana beno lenda baka mutindu na Jérémie 1:4, Nzambi tubaka, “Mu zabaka nge ntete nge vwanza ya kusala na kivumu ya mama ya nge. Mpe mu santisaka nge mpe kubikaka nge profete ya bayinsi.” Na yina yinki beno lenda tuba na yina beno salaka? Yinki mu lenda tuba na yina mu salaka? Ya kele Nzambi yina ke lakisaka kyadi. Nzambi zabaka beto ntete mbandukulu ya yinza.

¹²⁹ Yandi zola ve ti mosi kufwa. Kieleka ve. Kasi kana Yandi kele Nzambi, Yandi zabaka nani ke kuzwa mpulusu mpe nani ke kuzwa mpulusu ve, to Yandi zabaka ve kima mosi. Kana Yandi zabaka ve... Kana Yandi zabaka ve nani ke lenda na Enlevement, ntete yinza kusalama, kuna Yandi kele ve Nzambi.

Kana Yandi kele ya kukondwa nsuka, Yandi ke . . . Yandi zabaka konso dikasa, konso nzinzi, konso sidi, konso diyanzi, yina zolaka vwanda na zulu ya ntoto, ntete ntoto vwanda ya kusala. Ya kele kieleka. Yandi zabaka bima nyonso. Ntete mbandukulu ya yinza, Yandi zabaka beto. Biblia ke tuba, ti, “Yandi zabaka beto mpe solaka beto ntete.”

¹³⁰ Bika beto sukisa kaka yayi mbala mosi. Beto vutuka na Éphésiens, kapu ya 1te. Na kapu ya 5 . . . Kapu ya 1te ya Éphésiens, mwa ntangu kaka fyoti. Mu zola kaka kutanga awa minuti mosi, samu ti beno bakula kieleka ti ya kele ve kaka kima ti mu ke na kumeka na kutuba na beno. Ya kele kima Nzambi ke na kumekaka na kutuba na beno. Beno me mona? Ntangu yayi beno kuwa yayi, kieleka mbote, kapu ya Ntete ya ba-Éphésiens.

Paul, ntumwa ya Yesu Klisto na luzolo ya Nzambi, . . .

Muntu mosi yina sonikaka mukanda ya Hébreux, me sonika mukanda yayi.

. . . na basantu . . .

Yayi kele ve samu na bantu ya kukondwa lukwikilu kasi samu na basantu, ya kusanti- . . . bantu ya santu.

. . . bayina kele na Éphèse, mpe na baya kukwikama na Klisto Yesu:

Lemvo vwanda na beno, mpe ngemba, na Nzambi Tata ya beto, mpe na Mfumu Yesu Klisto.

Lusakumunu vwanda na Nzambi mpe Tata ya beto Mfumu Yesu Klisto, yandi yina me sakumuna beto na balusakumunu nyonso ya kimpeve na bisika ya mazulu . . .

“Landila mutindu Yandi . . .” Ntangu yayi, beno kuwa mbote ntangu yayi, nzila ya 4.

Landila mutindu yandi me sola beto na yandi ntete mbandukulu ya yinza, . . .

Nani kele “beto” kuna? Dibuundu.

. . . yandi solaka beto na yandi (Klisto) ntete mbandukulu, ya ntoto, ti beto zolaka vwanda ya santu mpe ya kukondwa kusemba na ntuala ya yandi na zola:

Yandi solaka beto samu na lukumu ya bana na nzila ya Yesu Klisto na yandi mosi, landila ya Yandi Mosi bakuzola ya mbote ya luzolo ya Yandi,

¹³¹ Nani salaka yawu? Nzambi salaka yawu. Nzambi zabaka na mbandukulu nani ke kuzwa mpulusu mpe nani ke kuzwa mpulusu ve. Kieleka, Yandi vwandaka zola ve ti mosi kufwa. Kasi Yandi fidisaka ve Yesu awa kaka samu na kumona kana beno ke—beno ke sala mutindu, “Mbote, Yesu ya mawa, mu ke tala Yandi kyadi. Mu banza ti mu ke sala mbote na kuzwa mpulusu mpe kundima yawu.” Ve, tata.

132 Nzambi zabaka na mbandukulu nani ke vwanda mpe nani ke vwanda ve. Na yawu, kuna, Yandi zabaka ti bayankaka ke vwanda, na yawu Yandi fidisaka Yesu na kusala munkayulu samu na bayina yina Yandi zabaka ntete. “Samu ti bayango yina Yandi zabaka ntete, Yandi me bokila. Mpe bayango yina Yandi me bokila, Yandi me nungisa. Mpe bayango yina Yandi me nungisa, Yandi me (na ntangu ya ntama) kembisa.” Beno bawu yayi.

133 Na yawu ya kele beno ve yina ke bumbaka beno mosi, ya kele lemvo ya Nzambi yina ke bumbaka beno. Beno vuukaka ve beno mosi, to kima ve beno salaka samu na kuvuuka. Ya kele lemvo ya Nzambi ti vulusaka beno. Lemvo ya Nzambi bokilaka beno. Luzabu ya Nzambi zabaka beno. Yandi zabaka ti beno ke vwanda na kati ya dibuundu yayi na nkokila yayi, ntete kwandi mbandukulu ya yinza, kana Yandi kele ya kukondwa nsuka. Kana Yandi kele ve, Yandi kele ve Nzambi. Kana Yandi zabaka bima nyonso, Yandi vwandaka Nzambi. Kana Yandi zabaka ve bima nyonso, Yandi vwandaka ve Nzambi. Kana Yandi kele Nzambi ya Ngolo nyonso, Yandi lenda sala bima nyonso. Kana Yandi lenda ve kusala bima nyonso, Yandi kele ve Nzambi ya Ngolo nyonso. Beno bawu yayi.

134 Na yawu wapi mutindu beno lenda tuba ti ya kele kima beno lenda sala? Ya kele ve na kima mosi beno lenda sala. Ya kele zola ya Nzambi mpe lemvo na beno, ti beno kele kaka awa. Kima mosi ve beno lenda sala, Nzambi bokilaka beno na nzila ya lemvo ya Yandi; beno me kuwa, me widikila, me ndima.

135 “Mbote,” beno ke tuba, “Mpangi Branham, na yina beto lenda sala nyonso.” Kieleka ve. Beno kele na kimpwanza. “Mbote, muntu yina lenda sala nyonso yina yandi zola.” Kieleka. Mu ntangu nyonso ke salaka yina mu zola kusala. Kasi kana beno kele Muklisto, beno ke zola ve kusala yimbi.

136 Ya kele na mwana mosi ya kento ya kukula ya kuvwanda na manima kuna na nkokila yayi, kento ya munu. Mu zola yandi na nyonso yina kele na kati ya munu. Mpe kana mu zabaka ti mu lenda basika na kento yankaka mpe kuluta mutindu yina, mpe kukwenda kutuba na yandi, mpe kutuba, “Meda, mu me sala yimbi,” beno banza ti mu ke sala yawu? Kana mu zola yandi mbote, mu ke zola ve kusala yawu. Ya kele kieleka.

137 Ntangu yayi, yinki kana mu ke tuba, “Oh, mu lenda sala yawu ve. Samu ti, mu ke tuba na beno samu na yinki. Yandi ke kufwa makwela na munu, mpe mu ke . . . Oh, mu kele mulongi. Beno me mona yinki ya ke sala? Yina ke katula munu na chaire, kana yandi kufwa makwela na munu. ‘Bakala ya kufwa makwela, oh!’ Mu ke na bana tatu; mu lenda banza ve na yawu. Kasi, mwana, mu . . .”? Mbote, kana ya kele mutindu ya kele, beno kele dyaka ya musiku. Ya kele ve na zulu ya lufulu ya musiku ti mu kwelaka yandi. Ya kele ve lufulu ya musiku yina

ke sala munu kuzinga kieleka na yandi. Ya kele samu ti mu zola yandi. Mu ke na kima ve ya kusala. Mu ke sala yawu na luzolo samu ti ya kele dyambu ya zola. Mpe kana beno zola kento ya beno, beno ke sala kima mutindu mosi.

¹³⁸ Mpe kana beno zola kento ya beno mutindu yina, na luzolo ya *phileo*, yinki beno fwana sala na Klisto na luzolo ya *agapao*, yina kele mafuku ya bambala kulutila ngolo, kana beno zola kieleka Nzambi? Kana mu zabaka na nkokila yayi ti mu lendaka basika mpe kukola, kana mu zabaka na nkokila yayi ti mu lendaka basika mpe kuvwanda ya kukondwa buzitu, kana mu zabaka, na nkokila yayi; kana ya vwandaka kaka na kati ya ntima ya munu na kusala mutindu yina, mpe ti mu ke kwenda mpe me sala yawu, na kuzabaka ti Yandi ke lemvokila munu, Mu zolaka sala yawu ve. Mu ke banza mingi na Yandi. Mu zola Yandi. Kieleka. Kieleka.

¹³⁹ Ya kele samu na yina mu zolaka ve kutekisa kimbangi ya munu na dénomination mosi, (ve, tata), ve na ba-Assemblée de Dieu, ve na Dibuundu ya Nzambi, ve na ba-Pèlerin ya sainteté, na ba-Méthodiste, na ba-Baptiste, na ba-Presbytérien, na Katolika. Mu ke baka ve nyonso yina ba lenda pesa munu, samu na kimbangi yayi. Samu ti, ya kwizaka ata mbala mosi ve na nzila ya muntu. Ya kwizaka na nzila ya Nzambi. Ve, tata. Mu ke teka ve bukuluntu ya munu samu na rock-and-roll ya Elvis Presley mosi, to samu na Bakatolika ya yandi ya mingi, to ya yandi, to, Ba-cadillac, to mafuku ya yandi ya ba-dollar, mpe nyonso yankaka, yina yandi ke kuzwaka konso ngonda. Ve, tata. Mu zola Yandi. Mpe kana mu . . . Ntangu nyonso yina mu ke zola yandi mutindu yina, mu ke vwanda kieleka na Yandi. Mpe kana Nzambi me bokila munu mpe me sola munu, Yandi me tula kima na kati ya munu, mpe mu zola Yandi.

¹⁴⁰ Mu ke bambuka moyo na Tata Isler. Beno nyonso zaba yandi, mingi ya beno nyonso. Yandi me kwiza kaka awa, sénateur ya Indiana; me kwiza awa, ke bula gitare ya yandi. Ntangu bébé ya munu kufwaka, kento ya munu kufwaka, mpe bawu nyonso vwandaka ya kulala awa na maziama. Mpe mu vwanda tambula na nzila, na maboko ya munu na manima ya munu, na kudila. Yandi me dumuka na mwa ya yandi, kaminio ya ntama, mpe me kwiza tula diboko ya yandi na nziunga ya munu, tubaka, “Billy, mu zola kupesa nge kyuvu.” Yandi tubaka, “Mu me kuwaka nge kulonga tii pene nge ke kubwa na chaire. Mu kuwaka nge na bansongi ya bala-bala mpe nyonso, kuboka samu na Klisto.” Yandi tubaka, “Ntangu yayi Yandi me baka papa ya nge. Yandi me baka mpangi ya nge ya bakala. Yandi me botula bawu nyonso zole, mpe bawu me kufwa na maboko ya nge. Kuna yandi me kufwa. Kento ya nge me kufwa, na kusimbaka maboko ya nge. Mpe bébé ya nge me kufwa, mpe nge vwanda bokila Yandi na kusadisa nge. Mpe Yandi me pesa nge mukongo ya Yandi. Yinki nge ke banza na Yandi?”

¹⁴¹ Mu tubaka, “Mu zola Yandi na nyonso yina kele na kati ya munu. Kana Yandi fidisa munu na difelo, mu ke zola dyaka Yandi.” Yandi kele ya kudedama. Mu ke tuba kaka yawu ve; bamvula makumi zole na sambanu me lakisa yawu. Ya kele kieleka.

¹⁴² Kana beno zola Yandi! Kisalu ve, ti, “Mu lenda sala *yayi* ve, mpe mu lenda sala *yina* ve.” Beno zola Yandi mingi na kusala yawu, samu ti Yandi solaka beno. Ata mbala mosi ve ti beno solaka Yandi, Yandi solaka beno.

¹⁴³ Beno ke tubaka, “Mu sosaka Mfumu, mpe sosaka Mfumu.”

Muntu ve ke sosaka Nzambi. Ya kele Nzambi, ke sosaka muntu. Beno lenda sosa lemvo ya Yandi, kasi Nzambi fwana soba nkadulu ya beno ntete beno lenda vwanda na manima na kusosa Yandi, samu ti, beno kele musumuki, beno kele ngulu. Ya kele kieleka.

¹⁴⁴ Mpe bayankaka ya beno bantu ke kwendaka na dibuundu mpe ke zingaka na nzila ya bumabele, ke basika awa mpe ke sala nyonso na yinza, mpe kuna dyaka kuvutuka mpe kutuba, “Yinga, mu kele ya dibuundu.” Mbote yina kele ntama mingi na nzila na kuvwanda na Nzambi. kieleka. Mu ve . . . Kasi beno ke mona bantu kusala yawu, beno lenda tuba. Oh, bawu kele bamabele ya dibuundu ya mbote. Ya kele kieleka. Beno lenda dyaka vwanda mabele ya dibuundu mpe kusala bima yango, kasi beno lenda ve kuvwanda Muklisto mpe kusala yawu.

¹⁴⁵ Mutindu mu vwanda me tuba, na suka yayi, “Nkwankwa ya ntama, kana ya me vwandaka na muntu ya luvunu, ya kele ngoyi-ngoyi.” Ya kele kieleka. Yandi mpe yembe vwandaka ya kuvwanda na nzasa mosi, vwandaka ya kuvwanda na kintala mosi. Mpe ngoyi-ngoyi yango ya ntama sepelaka ntangu ba bikaka yandi kukwenda, mpe kubasika na Dibuundu yina, ti yandi zolaka basika kuna mpe kuvwanda na zulu ya bamvumbi ya bibulu ya kufwa mpe “kwa, kwa,” mpe kudya ya *yayi*, kudya mpunda, mpe kudya ngombe ya kento, mpe nyonso yina ya vwandaka, yandi kusepelaka. Kasi ntangu Noé bikaka yembe kukwenda, yandi lendaka ve kuzwa kisika ya kutula bitambi ya makulu ya yandi. Yandi vwandaka mpe na muswa ya kuvwanda na zulu ya niama ya kufwa mutindu ngoyi-ngoyi salaka, kasi ya vwandaka bankadulu zole ya kuswaswana. Mosi ya bawu, yandi vwandaka yembe, na kubanda. Yandi vwandaka ngoyi-ngoyi, na kubanda.

¹⁴⁶ Kasi, kana beno tala, ngoyi-ngoyi yango lenda vwanda na zulu awa na zulu ya bamvumbi ya baniama ya kufwa mpe kudya, ndambu ya kilumbu. Yembe ke vwanda na bilanga ya blé mpe ke kudya, kati-kati ya kilumbu. Mpe ngoyi-ngoyi lenda pumbuka mbala mosi kuna mpe kudya madya ya yembe, mingi mutindu yandi zola. Yandi lenda kudya kaka mingi blé mutindu ngoyi-ngoyi lenda, to, mutindu yembe lenda. Kasi yandi, ngoyi-ngoyi,

lenda kudya madya ya yembe, kasi yembe lenda ve kudya madya ya ngoyi-ngoyi. Ya kele kieleka.

¹⁴⁷ Na yawu, muntu yango ya luvunu lenda kwiza na dibuundu, mpe kusepela mpe kuboka mpe kukembisa Mfumu, mpe kulandila mutindu yina, mpe kuvutuka kaka dyaka kuna mpe kusepela bima ya yinza. Kasi Muklisto ya kubutama dyaka lenda sala yawu ve, samu ti zola ya Nzambi ke bweta yandi na kisika yandi lenda ve kusala yawu.

¹⁴⁸ Na yawu kana beno kele kaka Muklisto na kuvukanaka na dibuundu, mpe me bika na kusalaka *yayi* mpe *yina*, mpe nsatu mosi yango kele na kati ya beno, beno kele dyaka na nsatu ya kudinda. Ya kele kaka kieleka.

¹⁴⁹ Mpe beno bakento yina lenda lwata na mwa bakupe ya bawu yina, mpe mbala mosi na ngaanda awa na bala-bala, mpe na manima kubokila beno mosi, “mukwikidi.” Beno kele mukwikidi, kasi beno kele mutindu mosi ya mawa, mu banza. Kana kieleka beno vwandaka na Klisto na kati ya ntima ya beno, beno zolaka kuzwa ve dibanza ya bima ya mutindu mutindu yina. Mu ke kipe ve yina bayankaka ya bakento ke salaka, mpe bayankaka ya bana ya bakento ke sala, beno ke vwanda mutindu yankaka, samu ti beno zola Klisto mingi.

¹⁵⁰ Mu sololaka na kento mosi kilumbu yankaka yina, na yinzo mosi, mpe yandi me nangula maboko ya yandi na zulu mutindu *yayi*, yandi tubaka, “Révérend Branham, mu kele na kutala kipene, awa na kati ya yinzo ya munu. Mu ke tambulaka mutindu yayi.”

¹⁵¹ Mu banzaka, “Nsoni na nge.” Na yinzo ya nge mosi, mu ke kipe ve kisika kisika beno kele. Ya kele kieleka. Beno lwata mpe beno sala mutindu kento, mutindu fwana mama. Nsoni na beno. Kasi beno bumba. . . Yinga, Biblia ke tuba, “Kana beno zola bima yango, bima ya yinza, zola ya Klisto kele ve kaka na kati ya beno.” Mpe kana beno zola Mfumu, kaka ntima ya beno nyonso, na moyo ya beno nyonso, na dibanza ya beno nyonso, beno ke lwata ve mwa bima yango ya mvindu, bima yango ya nganzi na beno. Ya kele kieleka.

¹⁵² Mpe nge diakre, mpe beno bayankaka awa, yina ke basikaka na bala-bala awa, mpe ke kangisa laka ya beno mpe ke tala na mosi na mosi ya bawu bakento. Nsoni na beno; mpe ke bokila beno mosi “bana ya babakala ya Nzambi.” Mu zaba ti yina ke nyengisa, kasi beno ke zola mingi kuvwanda ya kunyengisa ti na kuyokama na tiya kuna kukondwa nsuka. Na yawu kana beno ke salaka bima yango. . . Ntangu yayi, beno lenda sadisa yawu ve kana kento kulumuka bala-bala, ya kulwata ndambu. Beno, kana beno tala, beno kele ya kukwika na kumona yandi, kasi beno lenda balula yintu ya beno. Biblia ke tuba, “Muntu nyonso ke tala na kento samu na kulula yandi, me sala pité na yandi yimeni na ntima ya beno.”

153 Beno bika mu tuba na beno kima, mpangi ya kento ya luzolo, beno ke pesa mvutu na yawu. Mu ke kipe ve, beno lendaka vwanda ya kuvedila mutindu lis. Ya lendaka vwanda kieleka ti ata mbala mosi ve ti beno me salaka mutindu ya disumu yina, disumu ya kukondwa buzitu, na luzingu ya beno. Kasi kana beno lwata mutindu yina, beno ke pesa mvutu na lufundusu samu kusalaka pité na konso bakala yina talaka beno. Biblia me tuba. Mpe kukulumuka bala-bala, nani me zaba dyambu, bakala? Ve, tata. Beno. Beno me talana beno mosi mutindu yina.

154 Kento kele na kisika ya nene. Ya kele kisika ya kitoko, ya santu, ya mbote. Kasi yandi fwana bumba yandi mosi mutindu yina, samu na kusimba kisalu ya yandi mutindu yandi zolaka sala, mutindu mama, mutindu kento mpe na bumama. Ntangu bumama ke zengana, mukongo ya yinsi nyonso me zengana. Mpe ya kele samu na yina, bubu yayi, yinsi ya beto kele ya kubeba, ya kele samu na bakukondwa buzitu ya bakento ya beto. Ya kele kaka kieleka. Kieleka. Ya kele kupola na kati-kati ya beto, yina ke na kuzenga yawu.

155 Yina beno ke na nsatu kele kukutana Melchisédek yayi mbala mosi. Amen. Ti Yandi—ti Yandi sakumuna beno mpe kupesa beno vinu, dimpa, Luzingu ya Kukonda nsuka. Kuna beno ke mona bima mutindu yankaka. Kuna beno ke . . . Ya ke vwanda mutindu yankaka. Beno ke zola ve ti bana ya babakala kuvwanda na kusala . . . coyote kusala beno pyololo, pyololo ya kibulu, to nyonso yina beno zola kubokila yawu. Kieleka ve. Beno ke vwanda mutindu yankaka.

156 Mpe beno zola kutuba na munu ti beno ke lwataka mutindu yina, mpe ke basikakak kuna, samu na lukanu mosi yankaka? Beno ke tuba, “Oh, ya kele na mupepe mingi.” Beno ke na kuzonza disolo. Ya kele ve mupepe mingi. Science ke monisa ti ya kele ve mupepe mingi. Ya kele. . . Ya kele kulala yina me mata na zulu ya beno, mpangi ya kento. Beno ke bakula yawu ve. Mu ke na kumeka ve na kunyongia beno, kasi mu ke na kumekaka na kukebisa beno. Na kati ya mingi ya kele na kento mosi ya buzitu, yina kele kaka ya kutsyema mutindu yandi lendaka vwanda, mwa mama mosi ya mbote, yina ke basika na bima yango ya bawu, na bala-bala, na kuzabaka ve yina yandi ke na kusalaka, samu ti mulongi mosi ya retrograde ke na boma ti bakala ya beno kumanga na kufuta bikunku kumi ya yandi na dibuundu dyaka. Kana yandi me kutanaka ntete na Melchisédek, yandi zolaka banza ve na bima yango. Yandi zolaka longa Nsangu ya mbote. Kana ya ke zikisa mpusu ya mukongo ya bawu, yandi ke longa Yawu, na mutindu nyonso. Ya kele kaka kieleka.

157 Beno ke sala yawu, mpe ke salaka yawu samu ti mpeve ya kulula kele na zulu ya beno. Mpe beno babakala yina ke bikaka bakento ya beno kusala bima ya mutindu yango, mu ke na kivuvu fyoti na beno mutindu bakala. Ya kele kieleka. Ya kele kieleka. Ntangu yayi, ya kele ve na ata matondo ve samu na yawu, samu

ti, to, ata kulemvokila ve, samu ti, ya kele kieleka. Bakala nyonso yina ke bika kento ya yandi kubasika na bala-bala mpe kusala mutindu yina, mpangi ya bakala, beno fwana lwata bilele ya *yandi*. Ya kele kieleka. Beno, oh, la la!

158 Mu ke tuba ve ti kento ya munu ke sala yawu ve. Kasi mu fwana vwanda ya kusoba mpe ya kubaluka, na yina mu kele ntangu yayi, kana mu ke na kuzinga na yandi na yina yandi ke na kusala yawu. Mpe ya kele kaka kieleka.

Bana ya munu ya bakento, bawu lendaka sala yawu ntangu bawu ke kuma bakento. Mu ke tuba ve ti bawu ke sala ve. Mu zaba ve. Ya me tala kyadi ya Nzambi. Mu ke banza ti bawu kusala ve. Kana bawu sala yawu, bawu ke tambula na zulu ya bisambu ya tata ya kusungama. Bawu ke tambula na zulu ya luzingu ya muntu yina mekaka na kuzinga ya kulunga, kana bawu sala yawu. Ya kele kieleka. Kasi mu zola kuzinga ya kulunga, kulonga ya kulunga, kuvwanda ya kulunga, mpe lendaka pesa bawu malongi ya kulunga. Kana bawu sala yawu, bawu ke zibula nzila ya bawu na difelo, na zulu ya kulonga ya munu, mpe na zulu ya Klisto ya munu, mpe na zulu ya malongi ya munu, ya kele kieleka, kana bawu sala yawu. Kieleka. Ya kele kieleka.

159 Nsoni na beno. Kana beno me kutanaka Klisto, mbunzu na mbunzu, mpe ti Yandi me sakumunaka beno, mpe me pesaka beno bézè yango ya kundima na ntima ya beno, bampeve nyonso na difelo ke lenda ata mbala mosi ve na kulwatisa yawu dyaka na beno. Ya kele kieleka. Beno me soba katuka lufwa na Luzingu, mpe bakuzola ya beno kele ya kuvwanda na zulu ya mingi ya zulu mpe ve na zulu ya bima ya ntoto. Amen. Mu ke sala mbote na kubika dyambu yina. Ya kele mpasi mingi. Mbote mingi. Kasi ya kele Kieleka.

160 Mbote mingi, na yina beto ke landila ntangu yayi kaka mwa ntama fyoti, na manima beto ke sukisa.

. . . kieleka bawu yina kele bana ya Levi, . . . me kuzwa kumi ya kisalu ya kinganga-Nzambi, mpe kele na lutumu na kubaka mosi ya kumi ya bantu landila musiku, yina kele, na bampangi ya bawu, ata ti bawu me basikaka na menga ya Abraham:

Kasi yandi yina dikanda kele ve ya kutanga na bawu yina kuzwaka bikunku ya kumi na Abraham, mpe sakumunaka ya yandi yina kuzwaka nsilulu.

Mpe na bantembe nyonso ya yisi kele ya kusakumuna na ya zulu.

Mpe awa bantu yina ke kufwa ke kuzwa bikunku kumi; kasi awa yandi kuzwaka yawu, yandi yina ya kele kimbangi ti yandi kele moyo. Mpe mu. . .

Mpe mutindu mu lenda tuba . . . , Levi . . . , kuzwaka mosi ya kumi, kuzwaka bikunku ya kumi, futaka bikunku ya kumi na kati ya Abraham.

Samu ti yandi vwandaka ntete na kati ya menga ya tata ya yandi, ntangu Melchisédek kutanaka na yandi.

¹⁶¹ Nkadulu ya beno—ya beno na ntwala ya Klisto ke sala dibanza ya nene na yina bana ya beno ke vwanda. Luzingu ya beno yina beno ke zingaka na ntwala ya dibuta ya beno ke sala dibanza na yina bana ya beno ke vwanda. Samu ti, Biblia ke tuba, ti, “Yandi fundisa disumu ya nko ya bibuti na bana tii na bansungi ya tatu mpe ya yiya.”

¹⁶² Ntangu yayi, kaka mwa ntangu fyoti, ntete beto sukisa.

Mpe kuna kana kulunga (yawu yina mbala mosi dyaka kulunga ya beno) vwandaka na nzila ya kinganga-Nzambi ya Bulevi, (samu ti na yisi ya yawu bantu kuzwaka musiku,) na yinki dyaka nsatu ti kuna ti kwiza . . . nganga-Nzambi yankaka zolaka basika na manima ya mutindu ya Melchisédek, mpe ve ya kubokila na manima ya mutindu ya Aaron?

¹⁶³ Musiku, muntu ya musiku, beno me mona, “Oh, beno fwana sala yayi. Kana beno sala yayi ve, beno kele ve Muklisto. Kana beno zitisa ve saba! Kana ve . . . Kana beno kudya musuni! Kana beno sala bima yayi!” Mabanza nyonso yayi ya musiku. “Mpe beno fwana kwenda na dibuundu. Kana ve, beno ke kuzwa kitumbu na yawu. Beno fwana sala banevene.” Kima yina kele buzoba. Beno kele ya kuvuuka na nzila ya lemvo ya Nzambi, na nzila ya luzabu ya Nzambi, na nzila ya nsodolo ya Yandi. Nzambi bokilaka Abraham na nzila ya nsodolo, na nzila ya luzabu. Yandi bokilaka. Yandi yinaka Ésaü, mpe zolaka Jacob, ntete ti mosi kubutama. Ya kele kieleka. Ya kele—ya kele luzabu ya Nzambi yina zabaka bima yayi.

¹⁶⁴ Beno ke tuba kuna, “Wapi mbote ya kele na kulonga Nsangu ya mbote?”

¹⁶⁵ Ntangu yayi mu ke tuba na beno, yayi. Paul pesaka mvutu na yawu, to Yesu salaka, na kisika. Beno tala Yesu. Yandi tubaka, “Kimfumu ya Mazulu kele mutindu muntu yina me kwenda na kiziba to na dyzanga, mpe me losa na kati filé. Yandi me vutula. Na kati kuna, yandi me kuzwa bamfulututu. Yandi me kuzwa bamfulututu ya maza ya swi. Yandi me kuzwa banyoka. Yandi me kuzwa bamiseleketete. Yandi me kuzwa bampangu. Yandi me kuzwa bankala-bumi. Yandi me kuzwa ba-charognard. Yandi me kuzwa—yandi me kuzwa mbisi.” Na yina, muntu yina ke na kulobaka kaka.

¹⁶⁶ Ya kele mutindu Nsangu ya mbote. Beno tala yawu ntangu yayi, mu ke na kulongaka Nsangu ya mbote. Mu ke losa kaka filé. Mu ke vutula, mu ke tuba, “Ti bawu nyonso yina zola, muntu nyosno, ti yandi kwiza.” Awa ke belama bantu, na autel. Bawu

nyonso ke vukana pene-pene ya autel. Bawu ke sambila. Bawu ke dila. Mu zaba ve mosi na yankaka. Ya kele ve dyambu ya munu. Ba fidisaka munu ve samu na kufundisa.

¹⁶⁷ Kasi, ya kele na bayankaka na kati kuna yina kele bampangu. Ya kele na bayankaka yina kele miselekete. Ya kele na bayankaka yina kele banyoka. Ya kele, bayankaka, kele bamfulututu. Mpe ya kele na bayankaka yina kele bambisi. Ya kele ve dyambu ya munu na kufundisa. Mu ke tuba, “Tata, awa kele bayina mu me basisa kuna.”

¹⁶⁸ Kasi, mpangu vwanaka mpangu, na kubanda.

¹⁶⁹ Nkala-bumi, nkala-bumi yango ke vwanda kuna mpe ke tala bisika nyonso, mwa ntangu fyoti, yandi ke balula meso yango ya yandi, ke tala bisika nyonso, ke tuba, “Beno zaba yinki? Mu me kuzwa kaka na kutula mingi ya Yayi ti mu lenda ve.” Plop, plop, plop, na ngaanda bawu me kwenda.

¹⁷⁰ Mama yango ya nyoka ke telemisa yintu ya yandi, mpe ke tuba, “Mbote, beno zaba yinki? Kana bawu ke longa mutindu yina, na kuteleinaka kulwata ya bakupe mpe nyonso, yina me tadila munu. Na yawu mu ke kwenda ntama na nkonga yango ya ba-exalté. Ya kele nyonso ya fwana vwanda.” Beno vwanaka nyoka na kubanda. Ya kele kaka kieleka. Yinga.

¹⁷¹ Mpe awa kele ya kuvwanda tata kisyoto, na cigar yango ya nene mingi na yinwa ya yandi, mutindu ngombe ya Texas yina ba me zenga, ke telama kuna mpe ke tala bisika nyonso, ke tuba, “Mbote, ata mbala mosi ve ti ya me fundisaka munu na kunwa tabaka. Mu ke basika kaka na kima yayi, kaka ntangu yayi.” Mbote, nge mpangu ya ntama, nge vwanaka yawu, na kubanda. Ya kele kaka kieleka. Ya kele kaka kieleka.

¹⁷² Nkadulu ya beno ke monisa yina beno kele. Luzingu ya beno ke lakisaka, ke talisa yina beno kele, mpe kubanda na mbandukulu. Ya kele ve mpasi samu na beno na kumona yawu. Ya kele mpasi samu na munu na kumona yawu.

¹⁷³ Kana mu basika na kukwenda na Roy Slaughter fermier yina kele ya kuvwanda awa, mpe ti mu mona bangulu na zulu ya kikunku ya matufi ya baniama, ke na kudyaka matufi yango ya baniama, mu ke banza ve na kima ya yimbi samu na yawu. Yandi kele ngulu. Kasi kana mu mona mwana-dimeme na zulu ya kikunku ya matufi ya bibulu yango, mu ke kumiyufula. Uh-uh. Beno me mona? Beno vwanda na boma ve, beno ke mona yandi kuna ve. Yandi ke lenda kaka yawu ve. Ya kele kieleka.

¹⁷⁴ Mpe muntu yina kele ya kubutama na Mpeve ya Nzambi ke yinaka bima ya yinza. Ya kele kieleka, “Samu ti kana beno zola yinza to bima ya yinza, zola ya Nzambi kele ve na kati ya beno.”

¹⁷⁵ Kana mu basika na bakento konso kilumbu, mpe kukwiza, kutuba na kento ya munu ti mu zola yandi, yandi ke zaba ti mu kele muntu ya luvunu. Bisalu ya munu ke zonga ngolo mingi

kulutila bandinga ya munu. Kieleka. Mu ke monisa na yandi ti mu zola yandi ve, samu ti mu kele kieleka ve na yandi.

¹⁷⁶ Yandi ke tuba na munu ti yandi zola munu, mpe konso ntangu mu ke kwenda, yandi ke basika na muntu yankaka, ya ke monisa ti yandi zola munu ve. Kieleka. Bisalu ya yandi ke monisa yawu. Mu ke kipe ve bambala yandi ke meka na kutuba na munu, “Bill, mu zola nge, mpe ya kele ve na mosi yankaka na yinza kasi nge,” mu ke zaba ti yandi kele muntu ya luvunu.

¹⁷⁷ Mpe na yina beno ke meka na kutuba, “Mfumu, mu zola Nge,” mpe ke salaka bima ya yinza, Nzambi zaba ti beno kele muntu ya luvunu, na kubanda. Na yawu samu na yinki? Wapi mbote ya kele na kundima kimbangi ya ntama ya ndambu, mpe kima yankaka mutindu yina, na yina mazulu ya nene ya Mazulu kele ya kufuluka na kima ya kieleka? Samu na yinki beno zola kuvwanda Muklisto ya mawa, ya yinwa, ya ndambu, ya kusala ndambu, Muklisto ya nkumbu? Na yina, beno lenda vwanda kieleka mwana ya Nzambi ya kubutuka mbala zole, na bangunga ya kyese ya Mazulu yina ke na bula na kati ya ntima ya beno, na kusepelaka, mpe kukembisaka Nzambi, mpe na kuzingaka luzingu ya kununga na nzila ya Yesu Klisto.

¹⁷⁸ Ve na kumekaka na kusala yawu beno mosi, samu ti beno ke lenda ve, na kubanda. Kasi beno baka Yandi, Yawu kele Ndinga ya Yandi, mpe beno pema na zulu ya yina Yandi tubaka yina kele Kieleka. Mpe beno kwikila Yandi, mpe beno zola Yandi, mpe Yandi ke sala nyonso kutambula mbote samu na mbote ya beno. Kaka yina. Beno tala dibanza.

¹⁷⁹ Mfumu sakumuna beno. Yandi zola ve kunganina beno, kasi, mpangi, ya kele mbote na kuzwa mwa kunganina. Beno kele bana ya munu. Beno me mona? Mpe papa nyonso yina zola bana ya yandi kieleka ke sungika bawu, to yandi kele ve mutindu ya kulunga ya papa. Ya kele kieleka? Ya kele kieleka. Mpe papa yayi kaka kele na musiku mosi, mpe ya kele musiku ya yinzo. Mpe Nzambi kaka kele na musiku mosi, mpe ya kele Ndinga ya Yandi.

¹⁸⁰ Kana beto kwikila Ndinga ya Yandi, kuna beto ke zinga na nzila ya Ndinga ya Yandi. Ya kele kusalu ya beto, kana beto me kutanaka na Nzambi. Ve samu ti beno ke tuba, “Mbote, mu ke kwenda na dibuundu, mpe mu fwana sala *yayi*.” Beno kele muntu ya mawa. Beno sala yawu ve. Samu na yinki beno ke zola kuvwanda ngoyi-ngoyi ya mawa, ya yimbi ya kulemba, na yina beno lenda vwanda yembe? Kieleka. Beno fwana kuzwa kaka nsobolo ya nkadulu ya beno. Mpe beno soba nkadulu ya beno, beno kuma mwana ya bakala mpe mwana ya kento ya Nzambi, beno vwanda na ngemba na Nzambi.

¹⁸¹ Yesu! “Ya kele samu na yina Yesu mpe, ti Yandi zolaka santisa bantu na Menga ya Yandi Mosi, na kotalaka mpasi na ngaanda ya bankotolo,” Hébreux 13:12 mpe 13. Romains 5:1, “Na yawu na kuvwandaka ya kunungisa na nzila ya lukwikilu,” ve na

kupesanaka maboko, ve na mbotika ya maza, ve na kutentikaka maboko, ve bna kulookaka, ve na kuzonzaka na bandinga, ve na sensation mosi. “Kasi na kuvwandaka ya kunungisa na nzila ya lukwikilu, beto kele na ngemba na Nzambi na nzila ya Mfumu ya beto Yesu Klisto.” Beto me luta lufwa na Luzingu, mpe me kuma bivangu ya malu-malu, samu ti beto me kwikila na Mwana me basika na Nzambi, mpe me ndima Yandi mutindu Mvulusi ya beto mosi. Mpe Menga ya Yandi ke na kusala, na nkokila yayi, mutindu munkayulu samu na disumu ya beto, samu na kutelama na kisika ya beto.

¹⁸² Na Ngwisani ya Ntama, ya kele kaka na kisika mosi na kuzwa kubundana, ya kele na yisi ya menga. Konso mukwikidi fwana kwiza na yisi ya menga. Ntangu ba vwanda kufwa ngombe ya kento ya mbwaki, ba vwanda sadila yandi samu na munkayulu ya disumu. Yandi zolaka vwanda mbwaki. Mpe kapu ya 19 ya Exode, kana mosi ya beno ke zola kutanga yawu. Mpe ba zolaka baka yandi, na makulu, ya muvimba, kuyokama na tiya kintwadi. Mpe kuna yina vwandaka sala maza ya nkabwani. Ya vwanda vwanda na ngaanda ya bankotolo. Ba zolaka sala yawu na maboko ya kutsyema. Menga ya ngombe ya kento yayi vwandaka ya kutula na ntwala . . . na dibuundu, mpe mwa kulosa ya menga bambala sambwadi na zulu ya mwelo. Mpe ntangu yayi, konso muntu ya mvindu yina vwanda belama, zolaka bakalu ntete mpe kumona menga yango, mpe kubakula ti ya kele kaka na kubundana na yisi ya menga yango. Ya kele kaka kieleka kisika musambidi zabaka zolaka sambila, ya vwandaka na yisi ya menga.

¹⁸³ Kuna, kima ya ntete yandi zolaka sala, ntete yandi zolaka kwiza na yisi ya menga, ya zolaka vwanda na maza ya nkabwani kulosa fyoti na zulu ya yandi, mpe musumuki zolaka kuma ya kuvedila.

¹⁸⁴ Mpe bawu vwanda bakaka maza ya nkabwani mpe vwandaka losa fyoti yawu na zulu ya kizyeti, mpe vwanda kabula yandi na masumu ya yandi. Mpe na manima yandi vwanda tambula na yisi ya bamputa sambwadi yayi ya menga, mpe vwanda kuzwa kubundana na bayankaka ya mikwikidi na Mvwandulu ya Nzambi.

¹⁸⁵ Ya kele kaka na mutindu mosi ya kusala yawu. Ve na kupesanaka maboko, ve na kukumaka ya dibuundu, ve na bambotokolo, ve na ba-émotion; kasi beno belama na bamaza ya nkabwani, beno tula maboko ya beno, na nzila ya lukwikilu, na zulu ya yintu ya Yesu, mpe beno tuba, “Mu kele musumuki, mpe Nge kufwaka na kisika ya munu. Mpe Kima mosi na kati ya munu ke tuba na munu ti Nge ke lemvokila munu masumu ya munu, mpe mu me ndima Nge mutindu Mvulusi ya munu mosi ntangu yayi.” Beno luta na yisi ya Menga, kuna, beno kuzwa kubundana na bana ya Nzambi. Kaka yina. Beno kudya dimpa, beno kunwa vinu, mpe beno kuzwa kubundana na dibuundu.

186 Oh, Yandi kele ve ya kuyituka? Yandi kele ve mbote? Ntangu yayi, yayi lendaka monana ngitukulu samu na beno, nkundi. Kasi samu na yinki—samu na yinki mu ke telama awa mpe ke tuba bima yayi? Mu ke tuba yawu samu na kumeka na kusala munu mosi mutindu yankaka na muntu yankaka? Kana mu sala yawu, na yina mu ke na nsatu ya kubalula ntima. Mu ke na kutubaka Yawu samu Nzambi tubaka Yawu, samu Yawu kele Ndinga ya Nzambi. Mpe beno kuwa. Ya ke na ntangu ke na kwiza, mpe ntangu yayi ya kele, ti ntangu bantu ke kwenda esete na wesete, na kumekaka na kuzwa Ndinga ya Nzambi, mpe lenda kuzwa Yawu ve.

187 Ntangu beno ke kwenda na lukutakanu mosi, kima ya ntete beno ke sala, beno ke kota kuna mpe bawu kele na nkonga ya bakuzonza na bandinga mpe balutendulu, mpe muntu mosi ke telama mpe ke tuba na kulandilaka Masonuku; mpe yina kele nsuni. Kieleka. Nzambi tubaka na beto “na kuzonza ve mambu mingi ya mpamba,” na yina wapi mutindu samu na Yandi? Kana Yandi sonikaka Yawu mbala mosi, beno kwikila Yawu. Yandi fwana dyaka tuba Yawu ve. Badinga mpe balutendulu kele mbote, kasi ya fwana vwanda nsangu ya mbala mosi na dibuundu mpe na muntu mosi, ve kaka na nsuni mpe nyonso yina. Mpe na yina beno ke kwenda na ntwala na bima nyonso yayi yankaka.

188 Awa kilumbu yankaka yina, babakala zole kotaka. . . mpe bakala mosi na kento, mpe bakala yankaka mpe na kento, kaka bantwenya me kwelana, bawu kotaka kisika, samu na kukwenda na kusalu ya kulonga na Afrika. Muntu mosi me telama mpe me pesa profesi, mpe pesaka bandinga mpe balutendulu, ti, “Bawu kuzwaka mosi na yankaka kento ya mpangi.” Ti, “Ya zolaka vwanda ve mutindu yina. Bawu kwelaka muntu ya yimbi.” Mpe bantu zole yango kabukaka mpe vutulaka dyaka, makwela. Bakala mosi bakaka kento ya mpangi, yankaka yankaka, na kati ya dénomination ya nene ya Pantekote, mpe bawu kwendaka na Afrika mutindu ba-missionnaire.

189 Mpangi, ntangu beno ke sala ndefi ya beno, beno kele ya kukangama na ndefi yango tii lufwa ke pesa beno kimpwanza. Kieleka kaka. Kieleka. Ntangu beno ke sala ndefi ya beno, ya kele kukangama.

190 Nyonso yango, kele buzoba! Mpe ya me kuma tii na kisika ntangu beno ke kwenda na mabuundu, ya kele to madidi mingi mpe ya kukangama na musiku mpe ya kuyuma, tii thermomètre ya kimpeve ke kwenda makumi tanu na yisi ya zero. Bantu ke vwanda kaka mutindu verrue na cornichon, kaka mutindu ndundi mpe ya kuswaswana mpe ya kudasuka. Mpe kana beno kuwa muntu, kuna na manima na nsongi, yina lendaka boka mwa “amen,” mbala mosi na mwa ntangu, mutindu ya ke talisa bawu mpasi, bawu nyonso ke balula laka ya bawu mutindu oie, samu na kutala na nziunga, kumona yinki me sala. Beno zaba

ti ya kele kieleka. Mu ke na kutuba yawu ve samu na kusakana. Yayi kele ve kisika ya kusakana. Ya kele Kieleka. Kieleka. Mu ke na kutuba yawu samu ti ya kele Kieleka ya Nsangu ya mbote.

¹⁹¹ Mpe lweka yankaka, beno ke kuzwa nkonga ya buzoba ya nkonga ya ba-émotion ya nsuni kulandila, mpe Ndinga ya kieleka ya Nzambi na nsuka me kuma na kisika beno lenda na mpasi kuwa Yawu: kati-kati ya ntama ya nzila, Nsangu ya mbote, Nsemu na nzila ya munu, alleluia, Menga ya Mwana - dimeme, zola ya Nzambi yina ke kabisaka beto na bima ya yinza.

¹⁹² “Beno me zonzaka na bandinga, mpangi? Beno me kuzwa Yawu ve. Beno me lookaka tii kuwa madidi kumata na manima ya beno? Beno me monaka bambuma ya tiya?” Oh, buzoba! Kima mosi kele ve.

¹⁹³ Beno me kwikilaka na Mfumu Yesu Klisto mpe me ndimaka Yandi mutindu Mvulusi ya beno mosi? Mpe Mpeve ya Nzambi ke pesa kimbangi na mpeve ya beno, ti beno kele bana ya babakala mpe bana ya bakento ya Nzambi. Mpe luzingu ya beno ke pesa kimbangi ya mbuma ya zola, ya kyese, ya ngemba, ya mvibudulu, ya bumbote, ya lembami, ya kusalasana. Kuna beno kele Muklisto. Kana ya sala yawu ve, mu ke kipe ve yina beno ke sala.

Paul ke tuba, “Mu lenda pesa nzutu ya munu na kunyenga mutindu munkayulu. Kuzaba mansweki nyonso ya Nzambi. Mu lenda katula myongo na lukwikilu ya munu. Mu lenda zonza na bandinga mutindu bantu mpe Bawanzio. Mu kele kima mosi ve.” Wapi mutindu samu na yina? ya Ntete ya Corinthiens 13; beno tala kana Yawu kele kieleka to ve.

¹⁹⁴ Ntangu yayi beno tala kana—kana Corinthiens, ya Zole ya Corinthiens 13, mu banza ti ya kele yawu. To, mbote, ya kele to ya Ntete to ya Zole ya Corinthiens. Ya Ntete ya Corinthiens kuna, ya Ntete ya Corinthiens 13, ya kele kieleka. “Ata ti mu zonza na bandinga ya bantu mpe ya Bawanzio,” nyonso zole yina ba lenda tendula mpe yina ba lenda tendula ve, “mu kele kima mosi ve.” Na yawu kuna, wapi mbote ya kele na kubaka ntangu na yawu?

¹⁹⁵ “Ata ti mu ke bakula mansweki nyonso ya Nzambi.” Samu na yinki beno ke kwenda na baseminere mpe ke meka na kulongoka mingi na zulu ya yawu? Beno fwana sungama ntete, na Nzambi. Kieleka. “Ata ti mu, ‘Oh, alleluia ya kusakumuka!’”

¹⁹⁶ Beno kele na mingi ti beno lenda mpe ve kuzwa dibuundu kana ti beno kuzwa campagne ya kubelusa to mutindu mosi ya bimangu kusalama. “Nsungi ya kulemba mpe ya pité ke sosa kima mutindu.” Yinki beno ke zola na yawu?

¹⁹⁷ Paul ke tuba ti yandi zolaka sala mitindu nyonso ya bima, mpe kukatula myongo, mpe dyaka yandi kele kima mosi ve. “Kisika ya kele na bandinga, ya ke suka. Kisika ya kele na luzabu, ya ke zimbana. Kisika ya kele na baprofesi, ya ke suka. Kasi ntangu yina kele ya kulunga ke kwiza, ya ke vwanda

kukondwa nsuka,” mpe zola kele kulunga. “Nzambi zolaka mingi yinza, ti Yandi pesaka Mwana kaka yina basikaka na Yandi, Ti,” muntu nyonso yina ke tita, muntu nyonso yina ke tekita, muntu nyonso yina ke zonza, muntu nyo- . . . ? “muntu nyonso yina ke kwikila na Yandi ke kufwa ve, kasi me kuzwa Luzingu ya Kukonda nsuka.” Beno kwikila yawu, bana.

¹⁹⁸ Bawu ke mekaka na kusala yawu mingi na mutindu ya mpasi, bima *yayi* mpe bima *yina*. Na yina, ya ke nkufi na kima mosi: lukwikilu ya beno mosi na Nzambi. Kaka yina. Yina ke tuba yawu. “Na yawu na nzila ya lukwikilu,” ve na nzila ya kuwa. “Na nzila ya lukwikilu,” ve na nzila ya émotion. “Na nzila ya lukwikilu,” ve na nzila ya sensation. “Kasi na nzila ya lukwikilu beno kele ya kuvuuka; mpe yina na nzila . . .” Samu ti beno sosaka Mfumu? Samu ti beno vwandaka muntu ya mbote? Samu ti, “Nzambi, na nzila ya lemvo, zabaka beno ntete mpe kubikaka beno samu na Luzingu ya Kukonda nsuka.”

¹⁹⁹ Yesu tubaka, “Muntu ve lenda kwiza na Munu kana Tata ya Munu kubenda yandi. Mpe bawu nyonso yina ke kwizaka na Munu, Mu ke pesa bawu Luzingu ya Kukonda nsuka. Muntu ve lenda botula bawu na diboko ya Munu. Bawu kele ya Munu. Bawu kele ntangu nyonso ya kuvuuka. Mu me simba bawu. Muntu ve lenda botula bawu na diboko ya Tata ya Munu, mpe Yandi kele Yandi yina pesaka bawu na Munu. Bawu kele makabu ya zola ya Munu.”

²⁰⁰ “Mpe bawu nyonso yina Yandi zabaka ntete, Yandi me bokila bawu.” Yandi ke bokila ve muntu kana ti Yandi zabaka yandi ntete. “Bawu nyonso yina Yandi bokilaka, Yandi me nungisa bawu; bawu nyonso yina Yandi me nungisa, Yandi me kembisa.” Na yawu, beno me mona, beto kele kaka na kupema ya kulunga.

²⁰¹ Ntangu yayi, mu zaba ti ya kele na bantu mingi ya kukangama na musiku awa, makumi yivwa na yivwa na zulu ya nkama ya beno. Kasi, beno tala, kana beno ke baka kaka Yayi mpe ke bakula ti mu ke na kumekaka ve na kutuba na beno kima mosi.

²⁰² Kuna beno ke tuba, “Mbote, Mpangi Branham, mu ntangu nyonso vwanda banzaka ti mu zolaka sala *yayi* mpe mu zolaka sala *yina*.” Ya kele na luswaswanu mingi—mingi na kati ya yawu, mpangi, na yina beno fwana sala mpe na yina beno zola kusala. Beno kele ya kuvuuka, ve samu ti beno kuzwaka kima mosi ya kusala na yawu. Beno kele ya kuvuuka samu ti Nzambi vulusaka beno na ntwala ya mbandukulu ya yinza.

²⁰³ Beno kuwa, beno kuwa awa, Biblia ke tuba, na Apocalypse, mu ke banda na beno na ya ntete tii na nsuka ntangu yayi, Biblia ke tuba, na Apocalypse, ti, ntangu niama kwizaka, “Yandi vunaka bawu nyonso na zulu ya ntoto,” niama salaka yawu, “yandi vunaka bawu nyonso na zulu ya ntoto, bayina bankumbu vwandaka ve ya kusonika na Buku ya Luzingu ya Mwana-

dimeme,” kubanda ntangu reveil kubandaka, ya ke wakana mbote? Mbote, kubanda ntangu mulongi me longa dilongi yango ya ngolo? Kubanda ntangu bakala yina kubelukaka? “kubanda mbandukulu ya yinza.”

²⁰⁴ Wapi kisika ba kufwaka Yesu, na Calvaire? Ve, tata. Ba kufwaka Yesu ntete mbandukulu ya yinza. “Beno tala Mwana-dimeme ya Nzambi, yina ba kufwaka ntete mbandukulu ya yinza.” Nzambi, na mbandukulu, ntangu Yandi monaka disumu, Yandi monaka yina salamaka, Yandi zonzaka Ndinga. Mpe ba kufwaka Yesu ntete mbandukulu ya yinza. Mpe konso muntu vwandaka ya kuvuuka, vwandaka ya kuvuuka, landila Biblia, ntangu ba kufwaka Mwana-dimeme na kati ya dibanza ya Nzambi, ntete mbandukulu ya yinza. Ba kotisaka beno kuna na kati ya mpulusu. Na yawu yinki beno ke sala samu na Yawu?

²⁰⁵ Ya kele Nzambi. Lusakumunu na nkumbu ya Mfumu! “Ya kele Nzambi yina ke salaka kosalu; ve yandi yina zola to yandi yina ke kima, kasi Nzambi yina ke talaka kyadi.”

Kana ba kufwa Yesu ntete mbandukulu ya yinza, ya ke baka bamvula mafunda yiya ntete ti ya salama kieleka. Kasi ntangu Nzambi me vutukila yawu awa, konso Ndinga ya Nzambi kele na dyambu. Ya lenda soba ve. Ya lenda kabuka ve. Ya lenda kubwa ve. Mpe ntangu Nzambi kufwaka Mwana ntete mbandukulu ya yinza, ba kufwaka kaka Yandi mutindu ti Yandi vwandaka na Calvaire. Ya kele kima ya kumanisa, ntangu Nzambi tubaka yawu. Mpe beno bambuka moyo, ntangu ba kufwaka Mwana-dimeme, mpulusu ya beno vwandaka ya kukota na kati ya munkayulu, samu ti Biblia ke tuba ti nkumbu ya beno vwandaka “Ya kusunama na Buku ya Luzingu ya Mwana-dimeme ntete mbandukulu ya yinza.”

Wapi dyambu samu na yawu? Na yina yinki beto ke sala? Ya kele Nzambi yina ke talaka kyadi. Ya kele Nzambi yina bokilaka beno. Ya kele Nzambi yina solaka beno na Klisto ntete mbandukulu ya yinza. Yesu tubaka, “Ata mbala mosi ve beno—ata mbala mosi ve ve beno me solaka munu. Mu solaka beno. Mpe mu zabaka beno, ntete mbandukulu ya yinza.” Beno bawu yayi.

²⁰⁶ Na yawu, beno me mona, yina ke katula boma na beno. “Oh, mu ke kumiyufula kana mu lendaka landila na kusimbaka? Mu ke lenda yawu, lusakumunu na Nzambi, kana mu lendaka landila na kusimba.” Ya kele ve kana mu ke kusimba mbote, to ve. Ya kele kana Yandi simbaka mbote, to ve. Ya kele yina—yina Yandi salaka, ve yina mu salaka. Ya kele yina Yandi salaka.

Mutindu na yisi ya mpulusu ya musiku. Yayi kele kima ya fyoti mu zola kutuba ntete beto sukisa.

²⁰⁷ Yinki kana jument ya kukula buta mwa mulet? Mpe ti mwa mulet yango vwandaka na makutu nyonso zole ya kukabuka. Ti yandi vwandaka na meso ya kubaluka, mpe mabolongo ya kubaluka, makulu ya kubaluka. Mukila ya yandi ya kukangaka

kaka mbala mosi na zulu. Wapi mutindu ya kibulu ya boma ya ke talana! Mbote, muntu nyonso. . . Kana mwa mulet yango lendaka banza, ke tuba, “Ntangu yayi, vingila fyoti. Ntangu bawu ke basika na yinzo na suka yayi, mu ke tuba na nge, kieleka mu ke kuzwa kubula na yintu. Samu ti, bawu ata mbala mosi ve ke kusisa munu. Tala mutindu ya kima ya boma mu ke kele. Mu kuzwaka kwandi ve siansi.”

²⁰⁸ Mbote, ya kele kieleka. Beno kuzwaka ve siansi. “Mbote, mu butamaka na yinza yayi, kasi beno tala awa mutindu ya kima ya boma mu kele. Na yawu mu—mu—mu—mu ke kuzwa ata mbala mosi ve siansi. Mu ke lenda ve na kusala yawu. Mu lenda ve kusala yawu.” Beno me mona?

²⁰⁹ Kasi yinki kana mama ya yandi kele kieleka ya kulongoka na musiku? Yandi ke tuba, “Mwana, ya kele kieleka. Nge kele nyonso na ngaanda ya mutindu, mpe nge kele ve ya kulunga na kudya madya ya ntoto. Ya kele kieleka. Nge kele ve ya kulunga. Kasi, mwana, na mutindu mosi yankaka, nge kele ya munu ya ntete. Mpe, nge zaba ti, nge kele ya kubutama na muswa ya bukuluntu. Mpe nganga-Nzambi ata mbala mosi ve ke mona nge. Kasi, samu na nkumbu ya nge, ya fwana vwanda na mwana-dimeme yina zaba dyambu ve kukondwa kifu, yina fwana kufwa na kisika ya nge, na yawu nge lenda zinga.”

²¹⁰ Mbote, mwa mulet yango lendaka kaka kubula makulu ya yandi na zulu mpe kuzwa ntangu ya nene. Ya ke sala ata luswaswanu ve na yina yandi kele, samu ti yandi ke monana ve na zuzi, na nganga-Nzambi. Ya kele na mwana-dimeme ti nganga-Nzambi ke tala. Ve na mulet; na mwana-dimeme!

²¹¹ Mpe ya kele na Klisto ti Nzambi ke talaka, na beto ve. Ya kele Klisto. Na yawu kana ya kele na ata foti ve na Yandi, wapi mutindu ya lenda vwanda na foti? Wapi mutindu Yandi lenda tala foti, na yina beno kele ya kufwa mpe ti luzingu ya beno kele ya kubumbama na kati ya Klisto na nzila ya Nzambi, ya kutula kidimbu na nzila ya Mpeve-Santu? “Bawu yina kele ya kubutama na Nzambi ke salaka ve disumu, samu ti yandi lenda ve kusumuka.” Wapi mutindu yandi lenda sumuka na yina munkayulu ya kulunga kele na kisika ya yandi? Nzambi ata mbala mosi ve ke talaka na munu, Yandi ke talaka na Klisto, samu ti beto kele na kati ya Klisto.

²¹² Ntangu yayi, kana mu zola Klisto, mu ke zinga na Yandi. Yandi zolaka ata mbala mosi ve kukotisa munu kana ti Yandi zabaka. Kana Nzambi vulusaka munu bubu yayi, na kuzabaka ti Yandi zolaka zimbisa munu na basabala sambanu katuka bubu yayi, Yandi ke na kunwanisa lukanu ya Yandi Mosi. Kieleka. Na yina Yandi zaba kwandi ve bilumbu ya ntwala, kana Yandi vulusaka munu, na kuzabaka. Samu na yinki Yandi ke zola kuvulusa munu, na kuzabaka ti Yandi ke zimbisa munu? Nzambi ke salaka ve mambu, na manima kuvutula yawu na basabala

zole, samu na kuzitisa nsilulu ya Yandi. Ntangu Yandi ke vulusa beno, ya kele samu na ntangu mpe Seko.

²¹³ Ntangu yayi, beno lendaka natama na emotion, mpe kutuba, “Oh, yinga, lusakumunu na Nzambi! Alleluia! Mu me zonga na bandinga. Mu me boka. Mu me kuzwa yawu. Alleluia!” Yina zola ve kutuba ti beno me kuzwa Yawu. Kasi, mpangi, ntangu Kima mosi ke kulumuka awa, mpe ti beno kele ya kukangama na Klisto, kuna bambuma ya Mpeve ke landa beno. Beto ke pesa kimbangi, mpeve ya beto na Mpeve ya Yandi, ti beto kele bana ya babakala mpe bana ya bakento ya Nzambi. Lemvo beno kuzwa Yawu, bankundi.

²¹⁴ Mu ke kanga beno awa mpimpa nyonso, na kuzonzaka na yawu. Mu zola Yawu. Mu zola beno. Mu ke vutuka na mwa tabernacle yayi, kilumbu na manima ya kilumbu, kana Nzambi bumba luzingu ya munu. Mu zola kumona beno ya kukangama mpe ya kuvwanda na kati ya Lukwikilu yango ya Santu. Mu zola ve kumona beno kuvwanda na kidi-kidi, na mwa konso mupepe ya malongi, ke luta, mpe ke ningisa beno, mpe ke landila, mpe bawu ke kuzwa mwa menga na maboko ya bawu, to mwa galasi na zulu ya kizizi ya bawu, to kima yankaka, mpe kumona mutindu mosi ya—ya—ya bansemo na ntuala ya bawu, mpe mutindu mosi ya kima ya munimi, mutindu Biblia ke tuba, “Ya kunanguka na ntima ya yandi, mpe ke mona kima mosi ve.” Ya kele kieleka. Mu zola beno kuvwanda ya kukangama na Ndinga. Kana ya kele MUTINDU ME TUBA MFUMU, beno vwanda na Yawu, beno zinga na Yawu. Ya kele Urim Thummim ya kilumbu yayi. Nzambi zola beno kuzinga na Yawu. Kana ya kele ve na kati ya Ndinga, na yina beno zimbana yawu. Beno zinga samu na Nzambi, beno zinga samu na Klisto.

²¹⁵ Mpe kana ntima ya beno ke na kubanda na kukwenda ntama, beno zaba ti ya kele na kima yina me salama, beno vutuka na autel mpe beno tuba, “Klisto, vutula munu. . . kyese ya mpululu ya munu. Pesa munu zola yina mu kuzwaka mbala mosi. Ya ke na kukwenda, Mfumu. Ya kele na kima mosi mu me sala. Kumisa dyaka munu ya santu, ya kukangama. O Mfumu, kima mosi ve mu lenda sala. Mu ke na kulenda ve na kubika *yayi* mpe na kubika *yina*. Mu ke na kutalaka na Nge na kukatula yawu na munu, Mfumu, mpe mu zola Nge.”

²¹⁶ Mpe beno katuka na autel yango, muntu ya malu-malu na kati ya Klisto Yesu. Na yina beno ke tala ve na dibuundu ya beno, beno ke tala ve na nganga-Nzambi ya beno, beno ke tala ve na pasteur ya beno. Beno ke na kutala na Menga yina basikaka ya Mfumu Yesu. “Na nzila ya lemvo ti beno kele ya kuvuuka.”

Beto sambila.

²¹⁷ Mfumu, wapi mutindu ya malongi ya ngolo! Ya kele ntangu ti mwa dibuundu yayi lendaka kudya nsuni, mpe dyaka ve miliki ya Ndinga. Beto me vwanda mingi na miliki awa, na kupesaka bébé

bibéron ya yandi. Kasi beto fwana kuzwa bansuni ya ngolo, samu ti kilumbu ke na kukuma pene-pene. Bilumbu ya boma mingi ke na kwiza, mpe mpasi mingi kele na nzila. Mpe beto zaba ti ya ke vwanda dyaka ve na bilumbu ya kulutila mbote. Beto zaba ti beto kele na nsuka. Bilumbu ke landila na kuvwanda yimbi mpe yimbi tii ntangu Yesu ke kwiza, landila Masonuku.

²¹⁸ Beto lenda ve kusila bawu kima mosi na luzingu yayi. Kasi na luzingu ke na kwiza, beto lenda sila bawu Luzingu ya Kukonda nsuka na nzila ya Ndinga ya Nge, kana bawu lenda kwikila na Mwana ya Nzambi mpe kundima Yandi mutindu Munkayulu ya bawu, mutindu Yandi Yina telamaka na kisika ya bawu, mutindu Yandi Yina bakaka masumu ya bawu. Pesa yawu ntangu yayi.

²¹⁹ Ti bantu ya kukondwa ntembe kukuma mikwikidi. Ti bayina ke salaka na dibuundu, awa na nkokila yayi, bayina ke tubaka lukwikilu mpe vwanda zinga kaka na dibuundu, ti bawu kuzwa nzingulu na Nzambi; ti mutindu yango ya luzolo kukota na ntima ya bawu, ti bawu ke dila samu na masumu ya bawu, ke kufwa bawu mosi, mpe ke butama ya malu-malu na nzila ya Mpeve-Santu, mpe na kuvwandaka ya lembami mpe ya mbote, na zola, mpe ya kifuluka na kyese mpe balusakumunu. Na kuzingaka luzingu mosi, tii bawu ke vwanda na mungwa mingi ti bawu ke sala bantu yina kele pene-pene ya bawu, kuzwa mpwila ya kuvwanda mutindu bawu. Pesa yawu, Mfumu, samu beto me lomba yawu na Nkumbu ya Yandi.

Mpe na bayintu ya beto ya kukulumusa.

²²⁰ Mu ke kumiyufula, na nkokila yayi, kana ya kele na muntu mosi awa, yina ke tuba, “Mpangi Branham, kana mu vwandaka ya kutula na kitezolo ya Nzambi na ntangu yina, mu zolaka ata fyoti ve, ata fyoti ve, ata fyoti ve kulenda kukuma na lenda yina beno ke na kuzonzila na nkokila yayi. Mu zola nge kubambuka moyo na munu na kisambu, ti mu ke soba banzila ya munu, mpe ti Nzambi ke kota mpe ke basisa buzoba yayi na munu mpe kusala munu Muklisto ya kieleka”? Beno zola kutelemisa diboko ya beno samu na kisambu, mutindu beno, kana beno zola? Nzambi sakumuna nge. Nzambi sakumuna nge. Nzambi sakumuna nge, na manima kuna. Nzambi sakumuna nge. Nzambi sakumuna nge, tata. Nzambi sakumuna nge, mpangi ya bakala. Nzambi sakumuna nge, mpangi ya kento.

Ya Santu, ya Santu, ya Santu, Mfumu Nzambi
ya basoda.

Mazulu mpe ntoto kele ya kifuluka na Nge,
Mazulu mpe ntoto ke na kukembila Nge,
O Mfumu ya Zulu Mingi.

Ya Santu. . .

²²¹ Na yina beno ke na kubanzila ntangu yayi, na kusambilaka, na yina beno ke tala ya kundima ti beno salaka yimbi, mpe ti beno zola kuvwanda ya kusungama, beno zola kaka kutelemisa

diboko ya beno, kutuba, “Nzambi, sala munu yina mu fwana vwanda”? Nzambi sakumuna nge, ntwenya ya mama. “Nzambi, sala munu yina mu fwana vwanda.” Nzambi sakumuna nge, mpangi ya bakala, mpangi ya kento, nge, nge, nge na zulu *awa*.

²²² Kilumbu ke na kufwa. Mu zaba ti ya kele ngolo, bankundi, kasi ya kele mbote na kuzaba Kieleka ntangu yayi. Ntangu yayi na malembe beno sambila.

Ya Santu, ya Santu, ya Santu, Mfumu
Nzambi. . .

Yandi mosi, kele ya santu.

. . . fuluka na Nge,
Mazulu mpe ntoto ke na kukembila Nge,
O Mfumu ya Zulu Mingi.

²²³ Tata ya Mazulu, mutindu mwini ke kotaka na nkokila, barouge-gorge ke vukanaka na bayinti na baya bawu ya luzolo. Bandeke nyonso ke kwendaka na mazanza ya bawu. Bayembe ke pumbukaka na basinga, na zulu, samu ti banyoka kukwamisa bawu ve na mpimpa. Bawu ke vwanda kuna mpe ke sala makelele na mosi na mosi tii bawu ke lala. Na nsuka mwini ke lala.

²²⁴ Kilumbu mosi beto ke kuma na ngunga yina. Kulala ya mwini ke salama. Mu zaba ve na wapi ntangu, Mfumu. Kasi ya kele na bantu awa na nkokila yayi yina kele ya kundima ti bawu me sala yimbi, mpe bawu zola kukwiza na kisika yango, mutindu Lincoln kumaka na yawu na yina yandi vwanda kufwa, yandi tubaka, “Beno balula kizizi ya munu na kisika ya kulala ya mwini.” Mpe yandi bandaka, “Tata ya beto Yina kele na Mazulu.”

²²⁵ Mutindu Moody na ntama tubaka, “Lufwa kele yayi? Yayi kele kilumbu ya munu ya kuvwanda ya kubyadisa.”

²²⁶ O Nge ya Seko, kuzwa bawu kaka ntangu yayi, na nzila ya lukwikilu, na yina bawu kele ya kuvwanda kuna na bakiti ya bawu. Nge me konkota na ntima ya bawu, na kiti. Kuna kele autel ya bawu. Yayi kele ntangu samu na Nge na kuzwa bawu, kaka ntangu yayi. Nge tubaka, “Yandi yina ke kwiza na Munu, Mu ke losa yandi ve.”

²²⁷ Mpe kilumbu mosi ntangu mwini ke lala, kento to bakala ke telama na fulu, badokotolo me kwenda. O ya Santu, ya Santu, swi yango ya kitoko, ya mbote, kaka ntete mwini kulala. Ntangu beto lendaka telama mpe kutuba:

Kulala ya mwini mpe Mbwetete ya Mpimpa,
Mpe mbokolo mosi ya mpwelele samu na
munu!
Mpe ti ya vwanda na ata kufunda ve na ndilu,
Ntangu mu ke basika na mubu.

228 O Nzambi, pesa yawu na bawu na ngunga yayi na yina bawu ke na kuvingila, ke na kuvingilaka lusakumunu ya Nzambi na kwiza na zulu ya bawu. Katula nyonso ya kudasuka, nyonso ya yinza, na bawu, mpe vanga na bawu ntima ya malu-malu. Nge tubaka, “Mu ke katula ntima ya ntama, mpe ke tula na kati ntima ya nsuni. Mpe Mu ke tula Mpeve ya Munu na kati ya ntima yango, mpe bawu ke landa balutumu ya Munu mpe ke zitisa misiku ya Munu.” Samu ti, ya kele lutumu ya zola, mpe ve kusalu. Ya kele ya zola. Mpe zola ke kwikisa beto na kusala yawu. Ya kele kusalu ya zola, na kukwikisa beto. Ya kele kusalu ya beto na kulanda zola. Mpe mu ke sambila, Nzambi, ti Nge ke pesa yawu na konso ntima yina me telemisa diboko ya bawu na nkokila yayi.

229 Mpe bayango yina me telemisa ve diboko ya bawu, ti bawu ntangu yayi, na nzila ya lemvo, kutelemisa maboko ya bawu na kundima Nge, mpe na kuvwanda ya kufuluka na Mpeve ya Nge na mutindu yayi ya lembami, ya mbote, ya swi, ya kulemvuka; mpe kuvwanda ya kufuluka na lemvo, kubasika awa mutindu muntu ya kusoba. Mutindu bandeke ke yimba mutindu yankaka, mutindu muntu nyonso ke vwanda mutindu yankaka, na manima ya ngunga yayi, O Mfumu ya Zulu Mingi.

Ya Santu, ya Santu, ya Santu, Mfumu Nzambi
ya ntoto,
Mazulu mpe ntoto kele ya kufuluka na Nge,
Mazulu mpe ntoto ke na kukembila Nge,
O Mfumu ya Zulu Mingi.

230 Beno ntangu yayi na bayintu ya beno ya kukulumusa, beno bayina telemisaka maboko samu ba bambuka moyo na beno na kisambu, beno ke kuwa mutindu ti Nzambi me zonza na beno na mutindu mosi ntangu yayi, ve na nzila ya émotion, kasi kaka kima mosi kuna na kati ya beno, beno ke kuwa mutindu ti Nzambi me pesa beno Luzingu ya Kukonda nsuka? Beno ke kuwa mutindu ti beno ke basika na dibuundu na nkokila yayi mutindu muntu ya mutindu yankaka? Beno zola dyaka kutelemisa maboko ya beno na nkokila yayi? Nzambi sakumuna nge, mwana. Nzambi sakumuna nge, mpangi-bakala. Nzambi sakumuna nge, mpangi-kento. Nzambi sakumuna nge. Ya kele kieleka. “Mu ke basika na dibuundu yayi, na nkokila yayi, muntu ya malu-malu.” Ba-bébé me butuka ya malu-malu na Kimfumu ya Nzambi.

231 Yinki me salama? Mu zaba ti ya kele kifu ya kukwizaka na autel. Ya kele autel ya ba-Méthodiste, kifu ya ba-Méthodiste, mu zola tuba. Ya tulamaka na dibuundu ya ba-Méthodiste, na bilumbu ya John Wesley. Ya vwandaka ata mbala mosi ve na bilumbu ya Biblia. “Mutindu mingi kwikilaka vwandaka ya kubwela na Dibuuundu.” Beno lenda kwikila kisika nyonso beno kele, na bilanga, na bala-bala, bisika nyonso. Kisika nyonso, ya ke sala ata luswaswanu ve, kaka mutindu kaka beno ke ndima Klisto mutindu Mvulusi ya beno msoi. Ya kele kusalu ya

Mpeve-Santu yina ke kota na kati ya ntima ya beno. Ntangu beno ke kwikila Yandi, ke ndima Yandi, beno me luta lufwa na Luzingu, mpe beno me kuma bivangu ya malu-malu na kati ya Klisto Yesu.

Kuluta munu ve, O Mvulusi ya ngemba,
Ntangu yayi beno telama.

. . . kudila ya munu ya kukikulumusa;
Na yina Nge ke na kubokila bayankaka,
Kuluta munu ve.


²³² Ntangu yayi mu zola ti ntwenya ya bakala mpe mama, yina mu banza na kuvwanda kento ya yandi, yina vwandaka me telemisa diboko, mu zola dyaka beno kutelemisa diboko ya beno kuna na manima; mwana ya bakala, na kazaka ya mbwaki, mpe mama, ti bawu vwandaka me ndima Klisto mutindu Mvulusi ya bawu mosi. Ntwenya ya bakala ya kuvwanda awa na fauteuil roulant, vwanda me ndima Klisto mutindu Mvulusi ya yandi, yandi vwandaka me tala ti Nzambi me vulusa yandi. Mpe bayankaka na manima kuna yina vwandaka me telemisa maboko ya beno, beno telemisa dyaka yawu samu ti bantu lenda tala, kuzwa kubundana na beno.

²³³ Beno pesa bawu diboko, muntu pene, ya kuvwanda pene-pene ya bawu. Beno tuba, “Nzambi sakumuna nge. Nkwizulu ya mbote na kati ya kimfumu ya Nzambi, mpangi ya munu ya bakala, mpangi ya munu ya kento.” Kubundana, ya kele yina beto zola. Nzambi sakumuna . . . Beno pesa maboko na ntwenya ya bakala yayi awa na fauteuil. Ti Mfumu vwanda na yandi. Ya kele kieleka. Beto ke pesa beno nkwizulu ya mbote na kati ya kubundana ya Mpeve-Santu.

²³⁴ Kana beno me kuzwaka ntete ve mbotika, mpe ke zola kubotama, beno sala nzila ya beno mpe beno tubila yawu pasteur. Baptistère awa kele na maza na kati, na nkokila yayi, kana beno zola kuvwanda ya kubotika. Nyonso kele ya kuyilama. (Beno me kubikaka mbotika, na mutindu nyonso?) Kasi baptistère kele ya kuyilama, kana muntu zola kubaka mbotika. Biblia ke tuba, “Beno balula ntima, mosi na mosi ya beno, mpe beno botama na Nkumbu ya Yesu Klisto samu na lemvo ya disumu ya beno, mpe beno ke kuzwa dikabu ya Mpeve-Santu. Samu ti nsilulu kele samu na beno mpe bana ya beno, samu na bawu bayina kele ntama, mutindu mingi Mfumu Nzambi ya beto ke bokila.”

²³⁵ Beno zola Yandi? Beno telemisa maboko ya beno. Oh, Yandi kele mbote? Wapi mutindu beno ke sepela na Buku ya Hébreux yayi? Beno zola Yawu? [Dibuundu me tuba, “Amen.”—Mu.] Yinga. Mbote. Ntangu yayi, Yawu kele malongi. Oh, Yawu kele ngolo mpe Yawu kele ya kusungama, kasi beto zola yawu. Ya kele mutindu beto zola kuzwa Yawu. Beto zola Yawu ve na mutindu yankaka.

²³⁶ Ntangu yayi, beno ke kwikila ti Paul kuzwaka lutumu ya kulonga Yawu mutindu yina? Paul ke tuba, “Kana Wanzio kwiza mpe longa nsangu mosi yankaka ya mbote, ti yandi vwanda ya kusinga.” Ya kele kieleka? Na yawu beto zola Yandi na nyonso ya ntima ya beto.

²³⁷ Ntangu yayi mu ke lomba na pasteur na kukwiza awa kaka mwa ntangu fyoti, mpangi ya beto ya bakala ya ntalu mingi, Mpangi Neville, mpe yandi ke kuzwa dyambu ya kutuba na beno. Mpe ntangu yayi, kana Mfumu zola, beto ke mona beno Kilumbu ya tatu na nkokila, mpe kukubika samu na kukwenda na Mpangi ya bakala Graham Snelling samu na nkokila ya kuvukana. Mpe dyaka kulonga awa ke landila, na kapu ya 7 mpe ya 8, Kilumbu ya tatu yayi yina ke na kwiza na nkokila. Mpangi Neville. 

HEBREUX, KAPU YA SAMBWADI 1 KNG57-0915E
(Hebrews, Chapter Seven ¹)

BANDANDANI YA BUKU YA BA-HEBREUX

Nsangu yayi ya Mpangi William Marrion Branham, kulongamaka na Kingelesi, na Lumingu na nkokila, na kilumbu ya 15 ya Ngonda ya yivwa, na mvula 1957, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org